



KAR'ERA QILISH

QONUNLARI

- *Юксак орзулар ҳақида*
- *Мукаммалликка интилиш*
- *Доимий ўқиши ва ўрганиш*
- *Тезкор ва ишончли бўлиш*
- *Муваффақиятсизликлардан چўчимаслик*
- *Ўзига ишонч ва ҳаракатчанлик*

*«Үқиб-үрганмай туриб ҳам фойда ва зарарнинг
фарқига ета оламан деган одамни
тентак деб билмоқ керак»
Сукрот ҳаким*

Tuzuvchilar:

Ayupov Ravshan Hamdamovich
Boltaboeva Guzal Ravshanovna

Kar'era qilish qonunlari. Тошкент: ТМИ, 2018 йил, 54 бет.

АННОТАЦИЯ

Ушбу китоб ўз меҳнати туфайли бой-бадавлат бўлган инсонлар ҳақида кўп йиллар давомида тўпланган ва турли-туман оммавий ахборот воситаларида келтирилган материаллар асосида ёзилгандир. Унда бойликка эришиш муаммосига бағишлиланган кўплаб китоблар ва интернет тизимидағи минглаб мақолаларни ўқиши натижасида топилган асосий ғоялар, фикрлар ва стратегиялар келтирилади. Ушбу барча ғоя ва стратегиялар уларни дархол ўрганиш ҳамда ҳаётда қўллаш мумкин бўлиши учун оддий, текширилган, исбот қилинган ва қулай ҳолда келтирилган.

Китобча бойликка эришишнинг асосий усулларини ва кўпчиликка маълум бўлмаган сирларини ўрганмоқчи бўлган барча ўқувчи-талабалар, китобхонлар ва тадбиркорлар учун мўлжалланган.

«Яна бир ҳикмат бор: ҳазрати Одам -

Билим, ақлу идрок сабаб, муҳтарам».

«Кутадегу билиг» дан

МУНДАРИЖА

С ЎЗ БОШИ	4
КИРИШ: БИЗНЕСДА САБАВ ВА ОҚИБАТ ҚОНУНИ	6
МУВАФФАҚИЯТНИНГ 1-СИРИ: БЮОК ИШЛАР ҲАҚИДА ЎЙЛАНГ	9
МУВАФФАҚИЯТНИНГ 2-СИРИ: МАҚСАДИНГИЗНИ АНИҚ ВА РАВШАН	
ИФОДАЛАБ ОЛИНГ	12
МУВАФФАҚИЯТНИНГ 3-СИРИ: ФАҚАТ ЎЗИМ УЧУН ИШЛАЯПМАН ДЕБ	
ХИСОБЛАНГ	15
МУВАФФАҚИЯТНИНГ 4-СИРИ: ЎЗИНГИЗ СЕВГАН ИШНИ БАЖАРИНГ	17
МУВАФФАҚИЯТНИНГ 5-СИРИ: ДОИМО МУКАММАЛЛИККА ЭРИШИШГА	
ИНТИЛИНГ	18
МУВАФФАҚИЯТНИНГ 6-СИРИ: ИЛОЖИ БОРИЧА КЎПРОҚ ВА ТИРИШҚОҚЛИК	
БИЛАН ИШЛАНГ	20
МУВАФФАҚИЯТНИНГ 7-СИРИ: БУТУН УМР ДАВОМИДА МУТТАСИЛ ЎҚИНГ ВА	
ЎРГАНИНГ	22
МУВАФФАҚИЯТНИНГ 8-СИРИ: АВВАЛО ЎЗИНГИЗГА ТЎЛАНГ	24
МУВАФФАҚИЯТНИНГ 9-СИРИ: ЎЗ ИШИНГИЗ БИЛАН БОҒЛИҚ БЎЛГАН БАРЧА	
МАЪЛУМОТЛАРНИ ЎРГАНИБ ЧИҚИНГ	27
МУВАФФАҚИЯТНИНГ 10-СИРИ: ЎЗИНГИЗНИ БОШҚАЛАР УЧУН ҲИЗМАТ	
ҚИЛИШГА БАҒИШЛАНГ	28
МУВАФФАҚИЯТНИНГ 11-СИРИ: ЎЗИНГИЗ ВА БОШҚАЛАР БИЛАН РОСТГЎЙ	
МУНОСАБАТДА БЎЛИНГ	30
МУВАФФАҚИЯТНИНГ 12-СИРИ: ЎЗИНГИЗНИНГ ҲАЁТДАГИ ЭНГ АСОСИЙ	
ВАЗИФАЛАРИНГИЗНИ АНИҚЛАБ ОЛИНГ ВА БУТУН КУЧИНГИЗНИ УЛАРНИ	
АМАЛГА ОШИРИШГА ЙЎНАЛТИРИНГ	32
МУВАФФАҚИЯТНИНГ 13-СИРИ: ЎЗИНГИЗ ҲАҚИНГИЗДА ТЕЗКОР ВА ИШОНЧЛИ	
ҲИЗМАТЧИ ДЕГАН ФИКР ҲОСИЛ ҚИЛДИРИНГ	34
МУВАФФАҚИЯТНИНГ 14-СИРИ: БИР ЧЎҚҚИДАН БОШҚА ЧЎҚҚИГА	
КЎТАРИЛИШГА ДОИМО ТАЙЁР БЎЛИНГ	35
МУВАФФАҚИЯТНИНГ 15-СИРИ: БАРЧА ИШЛАРИНГИЗДА ЎЗ-ЎЗИНГИЗНИ	
НАЗОРАТ ҚИЛИШНИ ОДАТ ҚИЛИНГ	36
МУВАФФАҚИЯТНИНГ 16-СИРИ: ЎЗИНГИЗНИНГ ТАБИИЙ ИЖОДИЙ	
ИМКОНИЯТЛАРИНГИЗНИ УЙФОТИНГ ВА ИШГА ТУШИРИНГ	38
МУВАФФАҚИЯТНИНГ 17-СИРИ: ЎЗИНГИЗ ёКИ ИШ ФАОЛИЯТИНГИЗ УЧУН	
КЕРАКЛИ БЎЛГАН ИНСОНЛАР БИЛАН КЎПРОҚ БИРГА БЎЛИНГ	40
МУВАФФАҚИЯТНИНГ 18-СИРИ: ЎЗИНГИЗНИНГ СОҒЛИФИНГИЗГА АЛОҲИДА	
ЭЪТИБОР БЕРИНГ	43
МУВАФФАҚИЯТНИНГ 19-СИРИ: ФАОЛ, ҚАТЪИЙ ҚАРОРЛИ ВА ҲАРАКАТЧАН	
ИНСОН БЎЛИШГА ИНТИЛИНГ	45
МУВАФФАҚИЯТНИНГ 20-СИРИ: МУВАФФАҚИЯТСИЗЛИК ҚАБУЛ ҚИЛИНА	
ОЛИНАДИГАН ВАРИАНТ БЎЛИШИГА ҲЕЧ ҚАЧОН ЙЎЛ ҚЎЙМАНГ	47
МУВАФФАҚИЯТНИНГ 21-СИРИ: ТИРИШҚОҚ ВА ИНТИЛУВЧАН БЎЛИНГ	49

*«Илм ҳам боқийдир, ҳам абадий у,
Илмдан бошқаси саватдаги сув.
Илмсиз киши нима? Ҳайвон эрур,
Жонсиз тана, бир нақисиз айвон эрур».*

Абдулла Авлоний

С Ў З Б О Ш И

Ушбу китоб ўз меҳнати туфайли бадавлат бўлган инсонлар ҳақида муаллиф Брайан Трейси томонидан кўп йиллар давомида тўпланган материаллар ва унинг шахсий тажрибаси асосида ёзилгандир. Кейинги саҳифаларда унинг бойликка эришиш муаммосига бағишлиланган юзлаб китоб ва минглаб мақолаларни ўқиши натижасида топилган асосий ғоялар, фикрлар ва стратегиялар келтирилади. Ушбу барча ғоя ва стратегиялар уларни дарҳол ўрганиш ҳамда ҳаётда қўллаш мумкин бўлиши учун оддий, текширилган, исбот қилинган ва қулай ҳолда келтирилган. Муаллиф ёши ўттизларга боргандা, ҳаётини батамом ўзгартириб юборган бир ечимга келдим. У нега баъзи инсонлар бошқаларига кўра кўпроқ муваффақиятларга эришадилар, бунинг сир-асрорлари нималарда экан - деган саволларни чуқуррок ўрганишга киришди. Айниқса, унга баъзи бир ҳеч қандай бошланғич маблағсиз иш бошлаган тадбиркор инсонларнинг охир-оқибат бадавлатга айланишлари сирларини билиш жуда қизиқ эди. Худди шу муаммони хал килиш бўйича фикрлаш уни ушбу китобчани ёзишга олиб келди. Аввало у шу нарсани билиб олдики, ҳаётда катта муваффақиятларга эришиш учун инсон қандайдир алоҳида ҳислатларга эга бўлиши керак бўлади. Кўпчиликдан ажralиб чиқиш ва улардан юқорироқ бўлиш учун ҳар бир инсон ўзида ўртамиёна инсонларда бўлмаган сифатларни ва кўникмаларни ривожлантириши лозим бўлади. Катта молиявий муваффақиятга эришишнинг асосий сабаби пул ҳам, бошланғич капитал ҳам эмас экан. Энг асосийси – шундай катта миқдордаги пулларни ишлаб топиш ва уларни сақлаб қолиш учун сиз қандай шаҳс бўлишингиз кераклигидир. Бу китобда

келтирилган «муваффақиятга эришиш сирлари» меҳнат фаолиятингиз давомида канча пул ишлаб олишингизга боғлиқ бўлмаган ҳолда ҳаётнинг ҳар қандай жабхасида ҳам катта муваффақиятларга эришиш учун ўзига хос калит бўлиб ҳизмат қиласи. Бу ерда ёритилган муваффақият тамоиллари шу қадар қувватлики, улардан сиз учун мухим бўлган исталган мақсадга эришиш учун фойдаланингиз мумкин. Албатта бу ерда келтирилган усуллар ва қоидалар сизга танишдек туюлиши мумкин. Бунинг сабаби шундаки, юзлаб йиллар давомида турли хил инсонлар уларни кашф қилганлар, унутганлар ва яна қайтадан кашф қилганлар. Муаллиф ўзига бутунлай янги бўлган омадга эришиш тамоилларини яратадиган жуда ҳам доно ва олим одам сифатида эмас, балки муваффақият сирларини ҳаёт тажрибасидан келиб чиқсан ҳолда ҳолисона ўрганадиган ва уларни имконият даражасида бошқаларга етказадиган бир киши сифатида қарайди. Шунинг учун ҳам у олим Экклесиаст айтган бир доно сўзга ишонади: «*Барча янги нарсалар яхшилаб унумилган эски нарсалардир*».

Хозирда бу китобни ёзган муаллиф Брайан Трейсининг китоблари, аудиокассеталардаги ва компакт дисклардаги ўқув дастурлари ҳамда видеокассеталардаги семинарлари 20 та тилга ўтирилган ҳамда жаҳоннинг 38 мамлакатида тадбиркорлар томонидан ўрганилади. Брайан ўртacha қобилиятга эга бўлган инсон жуда катта фойдаланилмаётган имкониятлар ҳамда потенциалга эгалигига қатъий ишонади ва агар улар ўз мақсадларига эришиш учун ҳаётларида катта муваффақиятларга эришган бошқа инсонлар томонидан қўлланиладиган тамоилларни ишлатсалар, эзгу мақсадларига анча тезроқ етишадилар деб уқтиради. У ўз ғояларини дунёning 23 мамлакатидаги икки миллиондан ортиқ инсонга таниширишга муваффақ бўлган ва унинг ўзи ҳам ушбу ғоялар ва тамоиллар билан ҳамоҳанг яшаб, уларни амалиётга тадбиқ қилган. Натижада минглаб инсонлар ушбу бизнес тамоилларни ўз ҳаёт фаолиятларида қўллаган ҳолда, катта муваффақиятлар ва ривожланишга эришишганлар. У бизнесда муваффақиятга эришиш ҳақидаги деярли барча янги ва қизиқарли маълумотларни тўплайди ҳамда уларни ижодий равишда

қайта ишлаб, күпчиликка етказиши ҳаракат қиласы. Брайан Трейси бизнесда муваффақиятга эришиш мұаммоларини ўрганиш ва уларни оддий инсонларға етказиши бүйіча дунёдаги әнг күзгі күринган мұаллифлардан бири бўлиб ҳисобланади. Агар сиз ушбу китобни ўқиши бошлаган бўлсангиз, демак сизнинг әнг катта орзуларингиздан бири – ўзингиздаги яширин имкониятлардан тўла фойдаланган ҳолда келажақда бой-бадавлат, обуру-эътиборли ва таникли инсон бўлишдир. Бу рисолада келтирилган муваффақият сирларининг ҳар бири сиз интилаётган ажойиб ҳаёт тарзига тезроқ эришишингизга кўмак беради. Сизга бу жабҳада омад ва каттадан-катта муваффақиятлар тилайман!

КИРИШ: БИЗНЕСДА САБАБ ВА ОҚИБАТ ҚОНУНИ

«Дунё турмоқ учун дунёвий фан ва илм лозимдир.
Замона илми ва фанидан бебаҳра миллат
бошқаларга поймол бўлур»
Маҳмудхўжса Беҳбудий

Ушбу китобда келтирилган ва сиз ўрганмоқчи бўлган бизнес сирсиноатлари ҳаётингизни бутунлай ўзgartириб юбориши мумкин. Чunksи бу ғоялар ва стратегиялар кўп йиллар давомида миллионлаб бой ва камбагал, ёш ва қари аёл ва эркакларнинг ҳаётини тубдан ўзgartириб, улар учун молиявий муваффақият қалити бўлиб ҳизмат қилган. Бу тамоиллар оддий, самарадор ва фойдаланиш учун жуда қулай. Улар кўплаб марта синов ва текширувдан ўтганлар ҳамда уларнинг реал ҳаётга мослиги ва тўғрилиги исбот қилинган. Лекин уларни факатгина ўрганиб қолмасдан, танқидий равишда амалиётда қўллашингиз ва ҳаётингизга тадбиқ этишингиз ўта муҳимдир.

Биз инсоният тарихидаги әнг ажойиб ва сермаҳсул даврда яшаяпмиз. Хозирги пайтда ҳеч вақоси йўқ инсонлар ўз ишларини нолдан бошлаб, қисқа муддатларда бой-бадавлат бўляяптилар ва бундай ажойиб муваффақиятга эришганлар сони олдинги даврдагиларга нисбатан бағоят кўп миқдорни ташкил қиласыпти. Масалан, хозирги пайтда Америка, Россия ва Хитойда ўз кучлари ва ҳаракатлари билан бадавлат бўлган бадавлат инсонлар сони етти миллиондан ошиб кетди. Бундай инсонларнинг сони ҳар йили яна 15-20% га

ортаяпти. Ҳеч кимнинг бевосита ёрдамисиз миллиардер бўлганлар сони эса 200 тага етади. Инсоният тарихида бундай тез муддатларда катта бойлик орттириш ҳолати олдинги даврларда ҳеч ҳам кузатилмаган.

Мана сиз учун яна бир янгилик – юқорида келтирилган бундай бойларнинг қўпчилиги нолдан иш бошлаган. Хозирда бой-бадавлат бўлиб юрганларнинг 90 фоизидан кўпроғи ўз ишини бошлагандан ҳамёнида жуда ҳам катта маблағ бўлмаганлиги (*ёки умуман бўлмаганлиги*) диққатга сазовордир. Ўз бойлигини ўзи яратган ҳар бир бадавлат ўртacha ҳисоблагандан 3,2 марта банкрот бўлган. Кўпчилик бадавлат инсонлар катта молиявий муваффақиятга эришишларидан аввал бир неча марта муваффақиятсизликларга учраганлар. Бундай ҳолатларга бадавлат бўлиб кетган миллионлаб инсонлар дуч келганлар ва улар таслим бўлмасдан ўз ишларини давом эттирганлар. Демак, сиз ҳам муваффақият қозониш учун бундай ишларни амалга оширишингиз ва охир-оқибатда бой-бадавлат бўлиб кетишингиз мумкин, албатта.

Инсоният ҳаётидаги ҳеч қачон ўзгармайдиган қонунлардан бири – сабаб ва оқибат қонунидир. У жуда оддий бўлгани билан бир қаторда, жуда ҳам ажойиб хulosаларга олиб келади. Бу қонунга асосан ҳар қандай сабаб қандайдир бир оқибатни келтириб чиқаради. Демак, ҳар қандай ҳаракат натижасида қандайдир натижа пайдо бўлади. Ушбу қонун муваффақиятга эришиш тасодифий эмаслигини уқтиради. Демак, молиявий муваффақиятга ҳамда у орқали молиявий мустакилликка эришиш маълум муддат давомида бажарилган конкрет ҳатти-ҳаракатлар асосида амалга ошади.

Табиат ўз-ўзидан нейтрал бўлиб, сизни ўраб турган дунёга, бозорга ёки жамиятга сизнинг кимлигингиз ёки ким бўлмоқчилигингиз ҳеч қандай аҳамиятга эга эмас. Сабаб ва оқибат қонуни қуйидагини таъкидлайди: агар сиз ўз ақли, тафаккури ва меҳнат фаолияти туфайли бойлик ва муваффақиятга эришган ақлли инсонлар қилган ишларни қилсангиз, сиз ҳам ўшалар эришган натижаларга албатта эришасиз. Ва агарда сиз бу ишларни қилишдан бўйин товласангиз, бунинг оқибатида ҳеч қандай яхши

натижаларга эриша олмайсиз. Демак, агар сиз ўз акл-заковати ва ҳатти-харакати билан бадавлат бўлган инсонларнинг сир-асрорларини ўрганган ҳолда уларни ўз ҳаёtingизга тадбиқ этсангиз, шак-шубҳасиз сиз ҳам улардек натижаларга ва ҳаёtingизда катта миқдордаги мукофотланишларга эришасиз.

Лекин сиз бир нарсани доимо ёдда сақлаб қолишингиз керак бўлади: Ҳеч ким сиздан яхши ҳам эмас, ақлли ҳам эмас. Бу фикр жуда ҳам муҳим! Сизнинг муваффақиятсизлигингиз, ўзингизни жуда ҳам «арzon» сотишингиз (*иши ҳақингиз назарда тутилаяпти*) ва молиявий муваффақиятга эриша олмаётганингиз кўп жиҳатдан бошқаларни ўзингиздан ақлли, доно ва ҳаракатчан деб билишингиздадир. Бу фикр жуда ҳам нотўғри ва тамоман янглиш фикрdir. Масалан, ўз кучлари билан бадавлат бўлган инсонларнинг аксарият кўпчилиги ўртacha маълумотга эга бўлган оддий одамлардир. Улар ўртacha оилаларда тарбия кўрганлар, ўртacha мансабларда ишлаганлар, ўртacha уйларда қомат қилганлар ва ўртacha автомобилларда юрганлар. Лекин улар бадавлат одамлар қай тарзда ҳаракат қилишларини яхши тушуниб ва билиб олганлар ҳамда ўзлари ҳам катта натижаларга эришиш учун доимий равища худди шундай ишларни қилганлар. Бу ерда ҳеч қандай тасодиф ёки мўъжиза деган нарсанинг ўзи йук. Демак, агарда сиз ҳам худди шундай фикрласангиз ва худди шундай ҳаракат қила бошласангиз, сиз ҳам шубҳасиз ўша бадавлат кишилар эришган натижаларга эришасиз ва охир-оқибат бадавлатга айланасиз. Худди шу ҳолат сабаб ва оқибат қонунининг оддий кўриниши бўлиб ҳисобланади.

Ушбу китобчада ўз кучлари билан бой-бадавлат бўлганларнинг ажойиб самара келтирувчи сир-асрорлари келтирилади. Сизнинг моддий жиҳатдан тўла-тўқис таъминланган ва молиявий мустақил бўла олишингиз учун уларнинг ҳар бирини нафақат билишингиз, балки уларни ўз ҳаёtingизда изчиллик билан қўллай олишингиз жуда ҳам муҳим. Ушбу принципларнинг исталган бирини амалий фаолиятда қўллай олмаслик ёки буни истамаслик бошқа сабабларга боғлиқ бўлмаган равища сизнинг муваффақият, омад, баҳт ва саломатлик сари қилган барча ҳаракатларингизни чиппакка

чиқариши мумкин. Бу принципларнинг ҳар бирини кундалик амалий машғулотлар ва кўп марталаб қайтаришлар натижасида ўзлаштириб олишингиз мумкин. Уларга оғишмай риоя қилиш сиз учун худди нафас олиш ва чиқаришдек осон бўлиб қолиши лозим. Бадавлатлар муваффақиятларининг сир-асрорларини худди велосипед хайдаш ёки машина минишни ўргангандек каби ўрганиб, уларни ўз ҳаётингизда қўллашингиз керак бўлади. Бу юмуш унчалик қийин эмаслигини ҳаётнинг ўзи сизга кўрсатади.

МУВАФФАҚИЯТНИНГ 1-СИРИ: БУЮК ИШЛАР ҲАҚИДА ЎЙЛАНГ

“Улуғ ишлар ҳақида ўйланг,
фақат уларгина инсонларнинг қалбларига
ижсобий таъсир қилиши мумкин”
Марк Аврелий.

Ўз пулларини ўзларининг меҳнатлари натижасида топган бой-бадавлат инсонларнинг биринчи сирлари жуда ҳам оддий: *Улуғ ишлар ҳақида ўйланг!* Орзу қилишга майл кўрсатинг. Ўзингиз истаган ҳаёт ҳақида фикран орзу қилиб кўринг ва уни кўз олдингизга келтиринг. Қанча пул ишлашни хохлашингиз ва банк ҳисоб рақамингизда қанча пул бўлиши кераклиги ҳақида яхшилаб ўйлаб кўринг. Барча буюк аёл ва эркаклар муваффақиятга томон бўлган ўз хатти-ҳаракатларини уларда хозирги пайтда бўлган орзуларидан батамом фарқланувчи ажойиб орзудан бошлайдилар. Бу хақда америкадаги бир ашула матнида ҳам бундай деб айтилган: *«Агар орзунг амалга ошишини истасанг, сенда буюк орзу бўлиши керак».* Бу сўзлар нафақат ашуланинг лирик қахрамонига, балки сизга ва ҳар қандай бошқа инсонга ҳам тааллуклидир.

Фараз қилинг, сизнинг ким бўла олишингиз, нималарга эгалик қила олишингиз ёки қандай машғулотлар билан шуғулдана олишингиз учун ҳеч қандай чегараланишлар йўқ. Фақатгина қисқа вақт давомида тасаввур қилинг – сизда вақт, пул, таълим, тажриба, дўстлар, алоқалар, заҳиралар ва шунга ўхшашлар каби ҳаётдаги сиз истаётган орзуларга эришиш учун керакли

бўлганларнинг барчаси мавжуд. Бошқача сўзлар билан айтганда, сизнинг имкониятларингиз чегараланмаган. Бундай холда сиз ўзингиз ва оила аъзоларингиз учун қандай ҳаёт яратишни истар эдингиз?

«Келажакдан орқага» деб аталувчи ушбу ажойиб усул катта муваффақиятларга эришаётган эркак ва аёллар томонидан доимий равища ишлатилади. Бундай кўринишдаги фикрлар сизнинг онгингида ва рухиятингизга жуда ҳам катта таъсир ўтказади. Ушбу усульнинг қандай ишлашини қўйида кўрсатиб ўтамиз. Ўзингизни беш йил олдинга кўчиринг. Беш йил ўтди ва менинг ҳаётим ҳар томонлама идеал ҳолатда деб фараз қилинг. У қандай бўлаяпти? Сиз нима қиласиз? Қаерда ишлаяпсиз? Қанча пул ишлаб топаяпсиз? Банк ҳисоб рақамингизда қанча пул бор? Ҳаёт тарзингиз қандай?

Ўзингиз учун узоқ муддатли келажакка мўлжалланган перспектив тасвир яратинг. Сизнинг фикрингизда саломатлик, баҳт ва ривожланиш ҳақида қанчалик аниқ тасаввур пайдо бўлса, сиз булар томон шунчалик тез ҳаракат қиласиз ва улар ҳам сизга томон шунчалик тез ҳаракат қилади. Сиз ҳаётда нималарга интилаётганингизнинг аниқ фикрий тасвирини яратада олсангиз, сиз янада позитив бўлиб қоласиз, янада интилувчан бўласиз ҳамда бу ижобий орзуладарга реал ҳаётда ҳам эришиш учун янада ишонч ва қатъият билан ҳаракат қила бошлайсиз. Натижада сиз ўзингизнинг ички табиий ижодий потенциалингизни ишга туширасиз ҳамда ўзингизнинг буюк орзуладарингизга эришиш учун бир қанча оригинал ғоялар ўйлаб топасиз.

Ҳар қандай инсонда ўзининг орзуладари, ниятлари ва интилишларига томон ҳаракат тенденцияси мавжуд. Ўзингизга буюк нарсалар ҳақида ўйлашга рухсат бериб, ўзингиз хақингиздаги баҳони реал жиҳатдан оширасиз, ўз-ўзингизни хурмат қилишингиз ортади ва бу ўзингизга ўзингиз ёқишингизга, ўзингизни янада хурмат қилишингизга олиб келади. Бундай буюк орзуладар сизнинг ўз-ўзингизга нисбатан баҳоингизни оширади ва сизда ўзингизга бўлган ишонч даражаси ортади. Улар ўз-ўзингизни хурмат қилишингиз даражасини орттиради ва ички ғуур ҳамда баҳт сезгиларини

кучайтиради. Буюк орзулар ва тасавурларда бизни илгариgidан ҳам кўпроқ жунбушга келтирадиган бир нима борки, улар бизни мақсад томон ҳаракат қилишга ва янада яхшироқ бўлишга ундейди.

Сиз ўзингизга ўзингиз доимий равишда беришингиз ва унга аниқ жавоб топишингиз керак бўлган бир муҳим савол мавжуд: «Агар муваффақиятсизликка учрамаслигимни аниқ билганимда, мен фақатгина қандай бир нарсани орзу қилган бўлар эдим?»

Агар сизга ҳаётдаги исталган бирор бир кичик ёки катта, узоқ муддатли ёки қисқа муддатли мақсаднинг амалга оширилиши учун тўлиқ кафолат (*гарантия*) берилса, сиз қайси бир мақсадни танлар эдингиз? Агар муваффақиятсизликка учрамаслигинизни аниқ билсангиз, қандай буюк мақсад ҳақида орзу қилган бўлар эдингиз?

Сизнинг интилишингиз қандайлигидан қатъий назар, уни қоғозга ёзиб олинг ва ушбу буюк орзуга эришдим деб тасаввур қила бошланг. Энди орқага, хозирги пайтдаги ҳолатингизга назар ташланг. Сиз жуда ҳам истаётган вақт ва ҳолатга ўтиш учун сиз томонингиздан нималар қилиниши лозим? Бунинг учун қандай қадамлар қўйишингиз керак бўлади? Ўз ҳаёт тарзингизда нималарни ўзгартиришингиз зарур? Нимадан бошлаш керак ва нималардан воз кечиш керак? У ерда (*орзунгизга эришган вақтда*) сиз кимлар билан бўлдингиз? Кимлар у ерда сиз билан бирга бўлмади? Агар сизнинг ҳаётингиз барча томондан идеал бўлиб қолган бўлса, у қандай бўлиши керак? Нимани бошқача қилиш кераклигидан қатъий назар, бугунок биринчи қадамни амалга оширинг.

Буюк ишлар ҳақида орзу қилмоқ – молиявий мустақилликка эришиш каби эзгу мақсадингизни амалга ошириш учун бошлангич нуқтадир. Кўпчилик инсонларнинг ҳеч қачон материал тўқисликка эриша олмаслигининг биринчи рақамли, энг асосий сабаби шундаки, улар ҳеч қачон бундай қилиш мумкинлигини ҳаёлларига келтира ҳам олмайдилар. Натижада бундай шахслар ушбу йўналишда ҳаракат ҳам қилиб кўрмайдилар. Улар пул билан боғлиқ масалаларда ҳам бироз янглишадилар, барча топганларини ҳам,

баъзида ундан кўпини ҳам сарф қилиб юборадилар. Аммо сизда молиявий муваффақият ҳақидаги улуғ орзулар пайдо бўлганда сизнинг ўзингизни ва ҳаётингизни ҳис қилишингиздаги тасаввурингиз ҳам ўзгара бошлайди. Энди сиз ҳаётингиз яхши томонга ўзгармагунча фаол ҳаракат қиласиз ва астасекин кўзланган мақсадга эришишга ёрдам берадиган бутунлай бошқа юмушларни ҳам қила бошлайсиз. Демак, буюк ишлар ҳақида орзу қилиш – молиявий муваффақиятга эришиш ва бадавлат бўлиш учун ҳаракатнинг бошланишидир.

МАШК

Агар сизга муваффақиятга эришишига кафолат берилган тақдирда қиласиган ишларингиз (орзуларингиз) руйҳатини тузинг. Кейин улардан бирини танлаб, уни дарҳол бажаришига киришинг.

МУВАФФАҚИЯТНИНГ 2-СИРИ: МАҚСАДИНГИЗНИ АНИҚ ВА РАВШАН ИФОДАЛАБ ОЛИНГ

“Аниқ мақсадли инсон энг оғир йўлдан ҳам ҳаракатланаверади. Мақсадсиз инсон эса энг текис йўлда ҳам ҳаракат қила олмайди”
Томас Карлейл

Ўз орзуларингизни улар унчалик аниқ кўринмаган ҳолатдаги кўринишидан қоғозда аниқ ва равshan ёзилган мақсадларга айлантиринг. Эҳтимол инсоният тарихидаги буюк кашфиётлардан бири қуидагидир: «*Сиз ўзингиз энг кўп фикрлаган ҳолатга мос бўлиб қоласиз*». Сиз билан ҳаётда нималар бўлишини қуидаги икки асосий фактор аниқлаб беради: сиз нима ҳақида кўпроқ ўйлайсиз ва бу хақда қандай фикрлайсиз. Муваффақиятга эришган инсонлар асосан ўз мақсадлари ҳақида ўйладилар. Натижада улар доимий равища бу мақсадлар сари ҳаракатланадилар ва уларнинг мақсадлари ҳам доимий равища уларга томон ҳаракатланади. Бирор-бир нарса ҳақида қанчалик кўп вақт ўйласангиз, унинг сизнинг ҳаётингиздаги аҳамияти ҳам шунчалик кўп ортади. Агар сиз ўз мақсадларингиз ҳақида доимий равища фикрлассангиз, улар ҳақида гапирсангиз ва уларни кўз олдингизга келтирсангиз, сиз ҳаётда фақатгина ўзининг қийинчиликлари ва

муаммолари ҳақида гапирадиган ҳамда ўйлайдиган одамга нисбатан жуда ҳам кўп нарсаларга эришасиз. Қуйида сизга бадавлат бўлиш учун керакли бўлган мақсадни қўйиш ва унга эришишнинг етти босқичдан иборат бўлган кетма-кетлиги келтирилади:

Биринчидан, ҳаётингизнинг ҳар бир жабҳасида, айниқса, молиявий соҳада нималарни исташингизни аниқ ифодаланг. Кўпчилик инсонлар бу ишни ҳеч қачон қилмайдилар.

Иккинчидан, ўзингизнинг мақсадларингизни аниқ ва равshan қилиб қоғозга ёзиб қўйинг. Ўз мақсадларингизни ёзганингизда сизнинг қўлингиз ва бошингиз орасида қандайдир ажойиб учқун пайдо бўлади.

Учинчидан, ҳар бир мақсадни амалга ошириш учун охирги муддатни қўйиб чиқинг. Агар баъзи бир мақсадлар мураккаброк бўлса, оралиқ муддатлар ҳам қўйишингиз мумкин. Ўзингиз учун мақсадга интилишга керак бўлган назорат (*масалан, қачон ва қанча*) рақамларини беринг.

Тўртинчидан, ҳар бир мақсадни амалга ошириш учун зарур бўлган ҳаракатларнинг руйҳатини тузинг. Агар бу ишларни бажаришда миянгизга янги ғоялар келса, уларни ҳам руйҳатингизга киритиб қўйинг.

Бешинчидан, тузилган руйҳатни ҳаракат дастурига айлантиринг. Қайси ишни олдин ва қайси ишни кейинроқ қилишингизни аниқлаб олинг. Нималар муҳимрок ва нималар унчалик муҳим эмаслиги ҳақида қарор қабул қилинг.

Олтинчидан, тузилган режа бўйича конкрет ҳаракатларга ўтинг. Кўпчилик ажойиб мақсадлар ва ажойиб режалар зудлик билан ҳаракат қилинмаганлик сабабли йўқ бўлиб кетганлиги жуда ҳам ачинарли ҳолатdir.

Еттинчидан, энг асосийси, ҳар куни мақсадларингизга эришиш йўлида жуда бўлмаса бироз силжиш бўлиши учун нимадир қилинг. Ҳар куни ҳаракат қилиш ҳақидаги ушбу мажбуриятни қабул қилиш сиз амалга оширмоқчи бўлган ҳар қандай ишда ҳам том маънодаги муваффақиятга эришишни таъминлаб беради.

Сизга қуидаги машқни бажаришни таклиф қиласман: Бир варақ қофоз олинг ва унинг юқори қисмiga бугунги санани қўйиб, «Мақсадлар» деб ёзинг. Ундан сўнг, кейинги 12 ой мобайнида эришмоқчи бўлган ўнта мақсадингиз руйҳатини ёзинг. Мақсадларингизни худди бир йил ўтгандай ва мақсадингизга эришганингиз каби хозирги замонда ёзинг. Ҳар бир мақсадни унга шахсий кўриниш бериш учун «Мен» деган сўздан бошланг.

Ўзингизга кейинги йил учун ўнта мақсад руйҳатини тузганингиз заҳоти сиз жамиятдаги атиги 3% ни ташкил қиласдан эксклюзив аҳоли гурӯҳига кирасиз. Шуниси ачинарлики, ҳар қандай мамлакат аҳолисининг 97 фоизи ҳеч қачон ўз шахсий мақсадлари руйҳатини тузмаганлар. Ўнта мақсадингиз руйҳати тайёр бўлганидан сўнг, ўзингизга қуидаги муҳим бир саволни беринг: «Ушбу руйҳатга киритилган мақсадлардан қайси бири унга эришганимдан сўнг менинг бутун ҳаётим давомида менга энг катта ижобий таъсир кўрсатади?». Ушбу саволга қандайдир жавоб берганингиздан сўнг, ўша мақсадни думалок доира ичига олиб қўйинг ва унга биринчи рақам беринг – демак, бу мақсадга етишиш сиз учун яқин келажакдаги энг асосий вазифалардан биридир. Унинг учун бажарилиш муддатини аниқланг, бу мақсадга эришиш режасини тузинг ва ушбу режа бўйича доимий равища конкрет ишларни бажаринг. Ҳар куни иложи борича ушбу мақсадга эришиш йўлида албатта нималардир қилинг. Бу сизга ушбу муҳим мақсадга тезроқ етишишингизга ёрдам беради.

Ҳудди шу вақтдан бошлаб, ушбу мақсад ҳақида ўйланг ва гапиринг. Белгиланган мақсадга қандай қилиб эришиш ҳақидагина ўйланг ва сўзланг. Ушбу мақсадни амалга ошириш ва реалликка айлантириш учун қилишингиз керак бўлган турли хил амаллар ҳақида доимий равища фикрланг ва мулоҳаза қилинг. Бундай машқ сизнинг ижодий руҳингизни оширади, сиздаги интилишни кучайтиради ва аста-секинлик билан сиздаги яширин имкониятларни юзага чиқаради.

МАШК

Доимо қогозга ёзган ҳолда фикрланг. Яхшилаң үтириб олинг ва мақсадларингизни ёзишини бошланг ҳамда уларга эришиши учун зарур бўлган режсаларни тузинг. Фақат шу биргина машқни юқорида кўрсатилгандек тарзда бажариши сизни кейинчалик бадавлат инсонлар сафига қўшиши мумкин.

МУВАФФАҚИЯТНИНГ З-СИРИ: ФАҚАТ ЎЗИМ УЧУН ИШЛАЯПМАН ДЕБ ҲИСОБЛАНГ

«Мен – ўз руҳиятим капитаниман,
Ва мен – ўз тақдирим хўжайиниман».
Уильям Хенли.

Бугундан бошлаб ва бундан сўнг ўтмишда нима қилганингизга, хозир ким эканлигингида ва кейинчалик ким бўлишингизга бўлган жавобгарликни тўла хажмда ва юз фойиз ўзингизга юкланг. Ўзингизнинг муаммоларингиз ва камчиликларингиз учун жавобгарликни бошқалар зиммасига юкламанг ёки бу камчиликларни қандайдир бир тарзда оқлаш учун ҳаракат қилманг. Ҳаётдаги сизга унчалик ёқмайдиган муаммолар ҳақида шикоят қилишни тўхтатинг. Бошқа инсонларни ёмонлаш ва масҳара килиш одатидан батамом воз кечинг. Ҳаётингиздаги барча воқеа ва ҳодисалар ҳамда муаммолар учун фақат ўзингизгина жавоб берасиз. Агар сизнинг ҳаётингизда сизга ёқмайдиган ёки сиз келиша олмайдиган бирор бир муаммо бўлса, бу фақат сизга тегишли ва ушбу ҳолатни ўзгартириш фақатгина сизнинг ишингиз. Сиз ҳаётингиздаги барча ҳолат ва ҳодисалар учун ҳам масъулсиз.

Кўпчилик мамлакатлардаги инсонларнинг атиги 3% гина ўzlари учун ишляяпман деб ҳисоблашади. Сиз йўл қўйишингиз мумкин бўлган энг катта хатолардан бири – ўзим учун эмас, балки бошқа бир кимса учун ишляяпман деган тушунчадир. Аслида сиз доимо ўзингиз учунгина ишлайсиз. Сиз хозирги пайтда иш жойингиз қаерда бўлишидан қатъий назар, ҳар доим ўзингизга турли хил ҳизматлар кўрсатувчи шахсий корпорация президентисиз. Шунинг учун агар сиз фақат ўзим учун ишляяпман деган фикрга таянсангиз, ўзингизда мустақил, ўзи учун фақат ўзи масъул бўлган ва

ташаббускор тадбиркор менталитетини ривожлантирасиз. Натижада қандайдир ҳодисаларнинг қачон юз беришини кутиб ўтирамай, бу ҳодисаларни амалга оширилишга мажбур қиласиз. Сиз ўзингизни ўз шахсий ҳаётингизнинг хўжайини сифатида кўра бошлайсиз. Демак, сиз ҳаётингизнинг барча жабҳаларига, жумладан, соғлиғингизга, молиявий ҳолатингизга, бошқалар билан ўзаро муносабатларингизга, ҳаёт тарзингизга, уйингизга ва машинангизга ўзингизни батамом масъул деб биласиз. Худди шулар ўз қучи, ақли ва меҳнати туфайли бадавлат бўлган инсонларнинг руҳий ҳолатидир.

Масъулликни ўз зиммаларига олган инсонлар юқори натижаларга эришишга жуда ҳам жиддий тарзда ҳаракат қиладилар. Уларда доимо юқори ташаббускорлик даражаси мавжуд бўлади. Улар мураккаб масалаларни хал қилишга интиладилар ва доимо уларнинг зиммаларига кўпроқ масъулият юкланишини сўрайдилар. Натижада бундай инсонлар ўз ташкилотларида қимматли ва ҳурматга сазовор ҳизматчиларга айланадилар. Улар муттасил равишда ўзларини кўпроқ жавобгарлик ва бошқарув имкониятлари бўлган раҳбарлик мансабларини эгаллаш учун тайёрлайдилар. Сиз ҳам худди шундай қилишингиз ва шу тарзда ишлашингиз керак бўлади.

Шу ерда қуйидаги савол пайдо бўлади: Агар сиз бугун ўз компаниянгизнинг директори бўлиб қолсангиз ва ундан барча натижалар учун жавобгарликни ўз зиммангизга олсангиз, энг аввало қандай асосий ўзгаришни амалга оширап эдингиз?

Фикрингиз қандай бўлганидан қатъи-назар, уни қоғозга ёзиб олинг, режа тузинг ва бугуноқ уни амалга оширишни бошланг. Шу амалларнинг ўзи ҳам сизнинг ҳаётингизни бутунлай ўзгартириб юбориши мумкин.

МАШҚ

Нима учун сиз ўз молиявий мақсадларингизга эришиши учун бутун имкониятларингизни ишига солмаганингизни тушунтиришингиз ва оқлашингиз учун келтира оладиган сабабларингизнинг руйҳатини тузиб чиқинг. Сизнинг ривожланишингизни секинлаштиришига сабаб бўлган

нимадир ёки кимдир борми? Жавоб қандай бўлишидан қатъи-назар, ўз ҳаётингиз учун барча масъулиятни ўз зиммангизга олинг ва бугуноқ ҳаракат қила бошланг!

МУВАФФАҚИЯТНИНГ 4-СИРИ: ЎЗИНГИЗ СЕВГАН ИШНИ БАЖАРИНГ

«Агар сиз ўзингиз ҳақиқатан ҳам севган машғулот билан шуғуллансангиз, ҳаётда ҳеч қачон кўп ишлайтман демайсиз».
Брайан Трейси.

Ўзингиз ҳақиқатан ҳам севган машғулот билан шуғулланиш молиявий муваффақиятга эришишнинг энг асосий сирларидан биридир. Демак, ҳаётдаги энг асосий вазифаларингиздан бири – ўзингизга ёқадиган ва бундан ўзингиз лаззатланадиган, бу ишни қилишга сизнинг табиий талантингиз бўлган ҳамда сиз жуда ҳам яхши бажара оладиган ишни топишdir. Ўз кучлари билан бадавлат бўлган инсонлар қўпинча табиат инъом этган имкониятлари ва кучли томонлари улар танлаган ишни бажариш учун батамом мос келган одамлардир. Шунинг учун кўпчилик бадавлат инсонлар «бирор кун ҳам жуда қаттиқ, жонимни жабборга бериб ишламадим» деб таъкидлайдилар. Демак, сиз шундай фаолият доирасини топишингиз керакки, у сизга ҳақиқатан ҳам қизиқарли бўлсин, диққатингизни жалб қила олсин, сиз унда ўз имкониятларингиз ва талантингизни бемалол ишлата олинг.

Агар сиз ўзингиз яхши кўрган иш билан шуғуллансангиз, қандайдир кучга тўласиз, сизда ўз-ўзидан янги ғоялар пайдо бўлади ва бу ишни қандай қилиб яхшироқ бажариш бўйича янги фикрлар қуилиб кела бошлайди. Шу ерда менинг сизга бир саволим бор: *«Агар сиз эртага қўйқисдан миллион долларга эга бўлиб қолсангиз, бундан буён ҳам хозирги пайтда шуғуланаётган ишингиз билан машғул бўлаверардингизми?»*

Бу савол жуда ҳам муҳим. Аслида мен сиздан *«Агар сиз барча керакли нарсаларга эга бўлиб қолсангиз ва сизда ҳизмат турини бемалол танлаш имконияти яралса, сиз нима иш билан шуғулланар эдингиз?»* деб сўраяпман.

Агар бундай миллион доллар ўз меҳнати билан бадавлат бўлган бадавлат инсоннинг қўлига тушса, у ҳозирги иши билан шуғулланаверарди. Фақат энди у бу ишни бошқачароқ қиларди ёки уни юқорироқ даражада амалга оширади. Бундай инсонлар ўз ишларини шунчалик яхши кўрадиларки, уни ўзгартириш ёки нафақага кетиш ҳақида ўйламайдилар ҳам.

Эҳтимол, турли хил имкониятлар мавжуд бўлган реал ҳаётдаги энг асосий муаммолардан бири – сиз қандай ишни бажаришни яхши кўришингизни танлаш ва кейинчалик ўзингизни ушбу соҳага бахш этишdir. Бу ишни сиздан бошқа ҳеч ким сиз учун бажара олмайди.

МАШҚ

Қандай машгулом сиз учун жуда ҳам қизиқарли ва нима учун сиз уни яхши кўришингизни аниқлаб олинг. Шу пайтга қадар қандай машгулом сизнинг ҳаётдаги муваффақиятингизни таъминлаб берган? Агар сизда исталган иши билан шуғулланиши имконияти бўлганида сиз ўзингиз учун улардан қайси бирини танлаган бўлар эдингиз? Буларни ўз мақсадингиз сифатида кўриб, режа тузинг ва бугуноқ кўрсатилган йўналишида ҳаракат қилишини бошланг.

МУВАФФАҚИЯТНИНГ 5-СИРИ: ДОИМО МУКАММАЛЛИККА

ЭРИШИШГА ИНТИЛИНГ

«Қандай фаолият доирасини танлаганингиздан қатъи-назар, ҳаётингиз сифати ўзингизни қанчалик мукаммал қилишига интилганингиз билан аниқланади».
Винс Ломбарди.

Шу бугуннинг ўзидаёк шуғулланаётган ишингизда энг яхши бўлишга ҳаракат қилишга интилинг. Нима билан шуғулланингиздан қатъи-назар, бу соҳадаги малака ва билим бўйича юқориги 10% гуруҳга кирадиган шахслар тоифасига тааллуқли бўлишни мақсад қилиб қўйинг. Ушбу мақсадни амалга ошириш ва шуғулланаётган ишингизда энг юқори натижаларга эришиш сизнинг ҳаётингиздаги бурилиш нуқтаси бўлиши мумкин. Ҳақиқатан ҳам муваффақиятга эришган инсонларнинг барчасини атрофдагилар танлаган соҳаларидаги энг малакали инсонлар деб тан

олганлар. Сизнинг ишлаётган соҳангизда сиздан ақллиси, тиришқоғи ва сиздан малакалиси имкон борича камроқ бўлсин. Шунда муваффақиятингиз тўла кафолатланади. Ҳозирги пайтдаги юқори ўнликка мансуб бўлганлар аввал пастки ўнликка мансублиқдан бошлаганлар ва ўта ҳаракатчанликлари туфайли юқори натижаларга эришганлар. Ҳозирги пайтда муваффақиятга эришганларнинг кўпчилигининг иши аввал унчалик яхши бўлмаган. Ҳозирги пайтда ўз танлаган соҳасида биринчи ўринлардан бирида бўлган инсон авваллари охирги ўринлардан бирида бўлган. Шунинг учун ҳам кўпчилик қила олган ишни албатта сиз ҳам албатта қила оласиз ва ўз соҳангизда ажойиб мутахассис бўлиб, олий натижаларга эриша оласиз.

Муваффақиятга эришиш учун жуда ҳам ажойиб қоидани келтирамиз: Сиз жуда яхши мутахассис бўлганингиздан кейингина сизнинг ҳаётингиз ҳам жуда яхши бўлади. Сизнинг мукаммаллашишингизга чегаралар бўлмагани учун ҳаётингиз янада яхши бўлишига ҳам ҳеч қандай чекловлар йўқ.

Ўз фаолият соҳангизда мукаммалликка эришиш ва бу соҳадаги юқори ўнликка кириш ҳақида қарор қабул қилишингиз ҳаётингиздаги бурилиш нуқтаси бўлади. Ҳудди шу қарор ҳақиқий ва тўлақонли муваффақият калитидир. Ундан ташқари, ушбу қарор ўз-ўзини хурмат, ўз қадрига етиш ва шахсий ғурурнинг фундаменти ҳамdir. Агар сиз ҳақиқатан ҳам ўз соҳангиздаги биринчилардан бўлсангиз, ўзингиз хақингизда ҳам жуда ижобий равишда фикрлай бошлайсиз. Касбни жуда ҳам мукаммал эгаллаш сизнинг шахсиятингизга ҳам ижобий таъсир қиласи ва сиз бошқа инсонлар билан ҳам бошқача муомала қила бошлайсиз. Ўз соҳангиздаги энг яхши мутахассис эканлигингизни билганингиздан сўнг, сиз ўзингизни янада баҳтли ва ғурурли ҳис қиласиз.

Сизнинг ўзингиздан-ўзингиз сўрайдиган ва унга албатта жавоб беришингиз лозим бўлган жуда муҳим бўлган бир савол: «*Мендаги қандай бир кўникма ёки малака мен уни мукаммал равиида эгаллаган тақдиримда менинг ҳаётимга энг катта ижобий таъсир кўрсатади?*»

Албатта, барча ишларда юқори даражадаги кўникма ва малакага эга бўлиш қийин, аммо сизнинг муваффақиятга эришингиз учун муҳим бўлган бирор бир малака ёки кўникмани иложи борича мукаммал ривожлантириш учун бутун куч ва имкониятларингизни ишга солишингиз мумкин. Ҳудди шу ишни ўзингиз учун асосий мақсад қилиб олинг ва уни қоғозга ёзинг. Бажарилиш муддатини белгиланг, режа тузинг. Ундан сўнг ҳар куни муттасил равишда ишлаб, ўз танлаган фаолият соҳангизда иложи борича яхши бўлишга ҳаракат қилинг. Мукаммалликка эришиш учун қабул қилинган ушбу мажбурият ҳаётингизни қанчалик ўзгартириб юборганини кўриб, сиз ҳайратда қоласиз. Фақатгина шу мажбуриятни қабул қилишининг ва уни оғишмай бажаришнинг ўзигина сизни ўз меҳнати туфайли бадавлат бўлганлар сафига киритиши мумкин.

МАШҚ

Ўз жорий иш фаолиятингиздаги охирги натижса билан энг кўп жиҳатдан боғлиқ бўлган энг асосий жойларни аниқланг. Ўз ишингизда юқори натижаларга эришиш учун ишингизнинг қайси томонларини аъло даражада бажаришингиз лозим? Сиз нимада кучли ва нималарда кучсизсиз? Бугуннинг ўзидаёқ ўз меҳнат фаолиятингизнинг шундай йўналишини танлаб олингки, унда тиришқоқлик билан ишлаш келажакда сиз учун энг катта наф берииши мумкин бўлсин.

МУВАФФАҚИЯТНИНГ 6-СИРИ: ИЛОЖИ БОРИЧА КЎПРОҚ ВА ТИРИШҚОҚЛИК БИЛАН ИШЛАНГ

«Тиришқоқлик билан ишлаганим сайин,
шунчалик баҳтли бўляяпман».
Джеймс Тербер

Ўз меҳнати туфайли бадавлат бўлган барча инсонлар жуда ҳам катта тиришқоқлик билан ишлаганлар. Улар ишхонага ҳаммадан ҳам эрта келганлар, иш вақтида бошқаларга қараганда берилиб ишлаганлар ва бошқалардан кейин уйларига кетганлар. Улар кўпчиликка ўз фаолият доираларидаги энг меҳнаткаш инсонлар бўлиб танилганлар.

Амалий фаолиятингизда «40 плюси билан» формуласини ишлатинг. Бунинг маъноси шундан иборатки, сиз ҳафтасига 40 соат яшаш учун ишлайсиз, 40 соатдан ортиқ эса муваффақиятга эришиш учун ишлайсиз. Агар 40 соатгина ишласангиз, у ҳолда бу сизга яшаш учун етади, аммо катта муваффақиятларга ҳеч қачон эриша олмайсиз. Натижада катта молиявий ғалабага ҳам эриша олмайсиз. Сизнинг ҳамкасабаларингиз эса сизни ҳақиқатан ҳам ҳурмат қилмайдилар ва сизни юқори баҳоламайдилар. Ҳафтасига фақатгина 40 соат ишлаган ҳолингизда ўртacha одамлигингижча қолиб кетаверасиз. Аммо ҳафтасига 40 соатдан ортиқ ишлаган ҳар бир соатингиз сиз учун келажакка қилинган инвестиция (жамгарма) бўлиб қолаверади. Агар ҳафтасига 40 соатдан ортиқ қанча миқдорда ишлаётганингижни ва бу вақтларда нима қилаётганингижни билсангиз, у ҳолда келажакда ким бўлишингижни аниқ айтиб бериш мумкин бўлади. Узун иш кунлари ва тиришқоқлик билан ишлашга ҳеч нимани алмаштириб бўлмайди. Уйи миқёсида ўз меҳнатлари билан бадавлат бўлган инсонлар ҳафтасига ўртacha ҳисобда 59 соатдан ишлашар экан. Баъзиларида эса бу кўрсатгич 70 ёки 80 соатга етгани ҳам кузатилган. Улар ҳафтасига 6-7 кун иш билан банд бўладилар. Уларнинг иш кунлари ҳам бошқаларникуга қараганда анча узун. Агар бундай инсонлар билан учрашиш керак бўлса, уларга иш вақтидан олдин ёки иш вақтидан кейин қўнғироқ қилиш керак бўлади.

Юқоридагиларга яна бир фикрни ҳам қўшимча қилиш мумкин: ишхонада бўлган вақтингизда доимо ишланг – бекорчи ишларга чалғиманг. Агар ҳамкасабалар сиз билан чақчақлашиб, гап сотмоқчи бўлсалар, кечирим сўранг ва айтинг: «Мен ишишни давом эттиришиим керак!». Юқорида айтилганлар албатта уй ишларини қилмасликни, дўстлар ва ҳамкасабалар билан мулоқот қилмасликни ёки газета ва журналлар ўқимасликни англатмайди. Мухими, иш вақтида иш билан банд бўлинг. Шу бугунок ишхонада ҳаммадан кўра кўпроқ, тиришқоқроқ ва унумли ишлайдиган ходим бўлиш ҳақида қарор қабул қилинг ҳамда уни оғишмай амалга оширинг. Бундай мутахассис бўлиш сизга ҳаётда катта муваффақиятларга

эришишингизда қимматли ёрдам бериши мумкин бўлган инсонларнинг дикқат-эътиборини қаратади.

МАШҚ

Шу бугуннинг ўзидаёқ қандай қилиб ҳар куни кўпроқ ишилаш мумкинлигини таҳлил қилинг ва бунга имкон берадиган режса тузинг. Ишхонага бир соат олдин келиши ҳақида қарор қабул қилинг. Тушлик пайтида ҳам бирор бир ишини амалга оширишини одат қилинг. Иш вақти тугаганидан сўнг ҳам яна бир соат ишхонада қолиб, ишларингизни тугалланг ва кейинги кун режасини тузинг. Бу стратегияни амалда доимий равишда қўллаш ҳар кунги иши кунингизни 2 соатга узайтириши оқибатида ишингиз унумдорлигини салкам икки баробарга кўпайтиради.

МУВАФФАҚИЯТНИНГ 7-СИРИ: БУТУН УМР ДАВОМИДА МУТТАСИЛ ЎҚИНГ ВА ЎРГАНИНГ

«Узлуксиз ўқии ва ўрганиш – ҳар қандай фаолият турида ҳам муваффақиятга эришишининг энг минимал талабидир».
Денис Уэйтли

Сизда танланган ҳар қандай фаолият турида ҳам ўқиш, ўрганиш ва ривожланиш учун жуда катта яширин имкониятлар мавжуд. Сизнинг миянгиз имкониятлари, интеллектингиз, талантингиз бутун умр ўқиш ва ўрганиш учун етиб ортади. Сиз ўзингиз ўйлагандан кўра ҳам имкониятларингиз кўпроқ ва ақллироқдирсиз. Агар сиз ўз ақлингиз имкониятларини ишга солсангиз, сиз учун ҳеч қандай тўсиқ ёки муаммо бўлмайди ва сиз тафаккурингизни ривожлантириш орқали ўз эзгу мақсадларингизга bemalol эриша оласиз.

Сизнинг ақлингиз худди инсон мушакларига ўхшашир – агар у узлуксиз машқ қиласерса, янада ривожланаверади. Агар ақл ишлатилмаса, у кучдан қолиб, емирилади ва сийқалашаверади. Демак, ақлни ва тафаккурни

ривожлантириш учун иложи борича кўпроқ фикрлаш, ўқиш, ўрганиш ва малака ошириш керак бўлади. Сиз қанчалик кўп ўқисангиз ва ўргансангиз, шунчалик кўпроқ нарсаларни ўрганиб оласиз. Бу ҳам худди спорт каби – қанчалик кўп шуғуллансангиз, кўрсатгичларингиз ҳам шунчалик юқори бўлади. Бутун умр давомида ўзингизни ўқиш ва ўрганишга багишиласангиз, яна ҳам кўпроқ нарсаларни билиб оласиз ва кўпчилик мураккаб нарсаларнинг туб моҳиятига етиб оласиз. Бу эса сизга ҳаётда катта муваффақиятларга эришишга муттасил равишда ёрдам беради. Бутун умр давомида ўқиш ва ўрганишни давом эттириш учун эса қуидаги асосий қоидаларга риоя қилишингиз керак бўлади.

Биринчи қоида - ҳар куни камида 30-60 дақиқа ўз фаолият соҳангизга тегишли маълумотларни ёки китобларни (*оддий ёки электрон китобларни, интернет маълумотларини*) ўқиш, Интернетдаги, форум, блоглар, ижтимоий сайтлардаги янгиликлар билан танишиш. Ҳар куни бир соатдан ўқиш ҳафтасига битта китоб ўқишга teng. Демак, бунда сиз йилига салкам 50 та китоб ўқиган бўласиз. Ўн йилда эса 500 та китоб ўқиган бўлиб чиқасиз. Кўпчилик инсонлар йилига 3-5 китоб ўқишини ҳисобга олсак, сиз кунига бир соатдан китоб ўқиб, уларга нисбатан жуда катта афзалликларга ва маълумотларга эга бўласиз. Натижада сиз ўз соҳангиздаги энг маълумотли, тажрибали, хурмат-эътиборга сазовор, юқори мансабли ва кўп пул оладиган мутахассисга айланасиз.

Иккинчи қоида – аудиокассеталарга, видеокассеталарга ёки компакт дискларга ёзилган фойдали электрон китобларни тинглаш бўлиб, бу ишни уйда бўш вақтингизда ёки автомобилда кетаётганингизда амалга оширишингиз мумкин. Бу ишни муттасил равишда амалга ошириш эса сизга ҳаётингизда жуда катта муваффақиятлар келтириши мумкин.

Учинчи қоида – сиз учун қизиқарли бўлган ва иш фаолиятингиз билан боғлиқ бўлган турли хил ўқув курслари, анжуман ва семинарларда фаол иштирок этиш. Бу сизга фаолият соҳангизга доир энг сўнгги янгиликлардан боҳабар бўлишга имкон беради. Китоблар ўқиш, электрон китоблар ва

Интернет янгиликлари билан танишиш, семинарларда иштирок қилиш сизга каттадан-катта молиявий муваффақиятларга эришиш йўлида жуда муҳим бўлган малакавий ёрдам беради.

Шу бугуннинг ўзидаёк «бутун умр ўқиб-ўрганаман» деган қарор қабул қилинг. Бу иш сизнинг ажойиб муваффақиятларга эришишингизга қанчалик катта ёрдам берганини кўриб ҳайратда қоласиз. Турли хил манбаълардан фойдаланиб, узлуксиз таълим олиш сизни ўз меҳнати туфайли бадавлат бўлган инсонлар даврасига олиб кириш учун жуда муҳим фактор бўлганини албатта ҳис қиласиз.

МАШҚ

Ўз фаолият соҳангизда янада самарадор, маълумотли, билимдон ва кучли бўлишига имкон берадиган бир фанни ёки мавзуни танланг ва ўзингизнинг олдингизга ушибу фан ёки мавзу билан тўлақонли равиида танишиши мақсадини қўйинг. Бу лойиҳани ўз кучингиз билан амалга оширишига ҳаракат қилинг. Кейин эса ҳар куни бу фан ёки мавзу бўйича турли китоб ва қўлланмаларни ўқинг ёки интернетдаги маълумотлар билан танишинг. Бу фан ёки мавзу билан боғлиқ турли хил электрон китобларни компьютерингизга ёзиб олинг ва уларни ўрганиб чиқинг. Танланган фан бўйича турли хил ўқув курсларига қатнашинг, Веб-сайтларни ўрганиб чиқинг (агар тил билмасангиз, Google тизимининг таржима қилиши имкониятларидан фойдаланинг), ажуман ва форумларда иштирок қилинг. Ушибу лойиҳангиз билан шундай ишлангки, худди сизнинг келажагингиз бу фанни ёки мавзуни ўрганиши билан боғлиқ бўлгандай бўлсин.

МУВАФФАҚИЯТНИНГ 8-СИРИ: АВВАЛО ЎЗИНГИЗГА ТЎЛАНГ

«Ишлаб топган пулингизнинг бир қисмини албатта асраб қўйиш керак, чунки агар сиз пулни тежсаини ва жамгарини билмасангиз, у ҳолда сиз ҳеч қачон катта муваффақиятларга эриша олмайсиз».
У. Клемент-Стоун

Бутун умрингиз давомида ўз ойлик даромадингизнинг 10 фоизини олиб, сақлаб қўйиш ва уни жамғариш ҳақида шу бугуноқ қарор қабул қилинг. Ҳар бир турга мансуб иш хақингиз ёки бошқа турдаги даромадингиздан 10 фоизини олинг ва уни банкдаги ўзингиз учун очилган маҳсус жамғарма ҳисоб рақамига ўтказиб қўйинг (*ёки бу пулга қимматбаҳо металлар, нодир тошлиар ёки нодир антиквариант буюмлар сотиб олинг*). Агар сиз бутун умрингиз давомида бу ишни муттасил равишда амалга оширангиз, нафақага чиққан вақтингизда бадавлатга айланиб қолишингиз мумкин. Агар қўпроқ пул жамғариш ва уни инвестиция қилиш имкониятларини топа олсангиз, анча тез муддатларда бадавлат инсонга айланишингиз мумкин бўлади. Лекин бутун умр давомида пулни тежаш ва уни фойдали инвестицияларга жалб қилиш жуда ҳам осон иш эмас. Бунинг учун мақсадга интилиш, событқадамлилик ва катта ирода кучи керак бўлади. Бу ишни амалга ошириш учун уни мақсад сифатида кўриш, қоғозга ёзиб олиш, режа тузиш ва уни ҳаётга тадбиқ қилиш учун доимий равишда ишлаш керак бўлади. Лекин кейинчалик бу иш одат тусига кириб, автоматик равишда бажарила бошлайди ҳамда бу амал сизга молиявий муваффақиятни кафолатлаб беради.

Барча ишларда пулларни жуда ҳам эхтиёт бўлиб сарфланг. Ҳар қандай ҳаражатни ҳам шубҳа остига олинг – ўзингиздан «*Бу менга керакми ёки йўқми?*», деб сўранг. Ҳарид қилиш ҳақидаги ҳар бир қарорни иложи борича бир ҳафта ёки бир ойга кечикиринг, чунки бу оралиқда сизга ўйлаб кўришга етарли вақт бўлади ва товарнинг нархини бироз пасайтириш имконини ҳам топа оласиз. Кўпчилик инсонларнинг нафақага камбағал бўлиб чиқишиларига асосий сабаб, уларнинг ҳаридларни импульсив равишда ўйламасдан амалга оширишларидир. Улар ниманидир кўриб қолганларида қўпроқ ҳиссиётга бериладилар ва кўп ўйлаб ўтирасдан, уни дарҳол сотиб оладилар. Натижада уларнинг пуллари савдогарларнинг киссасига осонгина ўтиб қолади. Бунда улар «*Паркинсон қонуни*» нинг таъсирига тушиб қолган бўладилар, яъни, «*Сарф-ҳаражатлар даромадга пропорционал равишда ўсадилар*». Бунинг маъноси шундаки, сиз қанча пул топишингиздан қатъи-назар, худди шунча

ёки ундан кўпроқ миқдорда сарф қиласиз. Бундай инсонлар ҳеч қачон жамғара олмайдилар ва доимий равишда қарзга ботиб ҳаёт кечирадилар.

Лекин агар сиз том маънодаги муваффақиятга эришмоқчи бўлсангиз, зинхор Паркинсон қонунининг таъсир доирасига тушмаслигингиз керак. Агар сиз ўз даромадингизнинг 10 фоизини иқтисод қила олмасангиз, шу бугуннинг ўзиданок унинг жуда бўлмаганда бир фоизини маҳсус жамғарма ҳисоб рақамига ўтказиб қўйишни одат қилинг. Ҳар ойнинг бошида бу пулни қарзларингиздан қутулмай турибоқ, ўша ҳисоб рақамига ўтказиб қўйинг. Даромадингизнинг қолган 99 фоизига яшашга кўникинг. Бу иш амалга ошганидан сўнг жамғармангизга ўтказадиган пулингиз миқдорини 2 фоизга кўтаринг, кейинроқ эса 3 фоизга, ундан сўнг 4 фоизга ва ҳакозо тартибда ҳаракат қилинг. Сиз қанчалик кўп пулни жамғарма ҳисоб рақамингизга жўнатсангиз, келажакда молиявий мустақил бўлишингиз ва муваффақиятга эришишингиз учун шунчалик яқинлашаверасиз. Шу тарзда ҳаракат қилиб, бир йил давомида 10, 15 ёки 20 фоиз пулни иқтисод қилиб, жамғарма ҳисобингизга ўтказиб, қолган пулингизга қийналмай яшашни одат қилиб олишингиз мумкин. Бу амаллар натижасида сизнинг жамғарма-инвестицион ҳисоб рақамингиздаги пул миқдори муттасил равишда кўпая боради. Сиз эса ўз сарф-ҳаражатларингизга янада эҳтиёткор муносабатда бўлишга кўнишиб, қарзларингиздан ҳам аста-секин қутула бошлайсиз. Шу тарзда икки-уч йил ҳаёт кечириб, ўз молиявий ҳаётингизни батамом назоратга оласиз ва келгусида бой-бадавлат инсон бўлиш йўлига кирасиз. Бундай ишни жиддий равишда амалга ошириш кўпчилик инсонларга молиявий муваффақият эшикларини очиб бергани учун, сиз ҳам шундай қилиб кўринг – албатта бунга ишонч хосил қиласиз.

МАШК

Шу бугуннинг ўзидан кечиктирмай, жамғарма фоизлари каттароқ бўлган бирор бир банкда ҳисоб рақами очинг ва унга озгина бўлса ҳам депозит қўйинг. Кейин эса бу ҳисоб рақамидаги пул миқдорини кўпайтиши учун сиз ўзингизда бор бўлган барча имкониятларни ишга туширинг. Бу пул

миқдорини янада кўпайтириши йўлларини ўрганиши учун молия ва пул муомаласи фанини пухта ўрганинг. Бу йўналиш бўйича мутахассислар томонидан ёзилган китоб, мақола ва журналлардаги маълумотларни ўқиб ўрганинг. Моддий жиҳатдан мустақил бўлиши учун бир кун ҳам иқтисод қилишини, ўқиб-ўрганишини тўхтатманг.

МУВАФФАҚИЯТНИНГ 9-СИРИ: ЎЗ ИШИНГИЗ БИЛАН БОҒЛИҚ БЎЛГАН БАРЧА МАЪЛУМОТЛАРНИ ЎРГАНИБ ЧИҚИНГ

*«Агар сиз шуғулланаётган ишингизда юқори чўққиларга эришсангиз,
Сизга катта пул тошишга ва ҳизматда кўтарилишига
ҳеч нима ҳалал бера олмайди».
Дэн Кеннеди.*

Бозор юқори сифатли ишга ва юқори унумдорликка айни мос бўлган ажойиб мукофотлар беради. Ўртacha меҳнатни эса шунга мос бўлган ўртacha тарзда мукофотлайди. Ўртacha даражадан пастроқ бўлган ишни эса жуда ҳам паст даражада мукофотлаб, бу ишни бажарган инсонда омадсизлик ва ҳафагарчилик ҳисларини уйғотади. Шунинг учун ҳам сизнинг мақсадингиз – ўзингиз танлаган фаолият соҳасидаги барча майда-чуйда маълумотларгача тушуниб олиб, унинг ҳақиқий билимдони бўлиб олишдир. Шундагина сиз ўз ишингизни янада яхши ва сифатли тарзда бажара оласиз.

Ўз фаолиятингизга оид барча маҳсус журналларни диққат билан ўқиб чиқинг. Энг охирги пайтларда нашр килинган китобларни ҳам назарингиздан қочирманг. Ушбу соҳадаги билимдон ва тажрибали инсонлар томонидан ташкил қилинган ўқув курслари ва семинарларда фаол иштирок этинг ҳамда бу соҳадаги энг яхши мутахассислар билан яқин ҳамкорлик қилинг. Интернет орқали маълумот алмашиниш ва ҳамкорлик қилиш ҳам ёмон бўлмайди. Қийинчиликларни енгиш қонуни шуни уқтирадики, агар бирор бир инсон исталган соҳадаги энг кўп маълумотларни йиғса, уларни ўрганса ва хаётда қўллай олса, у албатта бу соҳадаги энг катта чўққиларга эриша олади. Масалан, агар сиз сотув билан шуғулланаётган бўлсангиз, у ҳолда бутун умрингиз давомида сотув жараёнини яхшилаб ўрганинг. Билимдон ва саводли савдо ходимлари оддийларига нисбатан тахминан 16-20 марта кўп

пул ишлайдилар. Холбуки улар ҳам, булар ҳам бир хил иш билан шуғулланадилар. Агар сиз менежмент билан шуғулланаётган бўлсангиз, энг буюк ва билимдон ҳамда малакали менежер бўлиш ҳақида қарор қабул қилинг. Агарда сиз ўз шахсий бизнесингизни ташкил қилаётган бўлсангиз, тадбиркорлик фаолиятининг усулларини, стратегияси ва тактикасини ўрганинг ҳамда кундалик амалиётингизда янги ғоя ва усулларни доимий равища синаб кўраверинг. Асосий мақсадингиз – ўз фаолият доирангизда ва ишингизда энг яхши мутахассис бўлиш бўлсин. Биттагина ғоя, фикр ва кичкина бир нарсани билиб олиш ҳам баъзида сизнинг ҳаётингиздаги бурилиш нуқтаси бўлиб қолиши мумкин. Шунинг учун ҳам уларни ахтаришни, топишни ва синаб кўришни ҳеч қачон тўхтатманг.

МАШҚ

Ўз ишингизнинг энг асосий томонларини, нозик жиҳатларини ва бошқалардан фарқли бўлган хусусиятларини аниқланг. Келажакда ўзингиз танлаган соҳада етакчи мутахассис бўлиш учун қандай асосий маълумотларга, билимларга ёки кўникмаларга эга бўлишингиз керак? Худди шу билим ва кўникмаларга эга бўлиш ҳамда уларни янада ривожлантириши учун мос келадиган иш режасини тузинг ва мунтазам равишида ҳар куни уни ҳаётга тадбиқ қилиши устида ишиланг.

МУВАФФАҚИЯТНИНГ 10-СИРИ: ЎЗИНГИЗНИ БОШҚАЛАР

УЧУН ҲИЗМАТ ҚИЛИШГА БАГИШЛАНГ

«Агар сиз иложси борича кўпроқ инсонларга улар истаган орзуларига эришишиларига ёрдам берсангиз, сиз ҳам ҳаётдан истаган нарсангизни олишингиз ва орзуларингизга эришишингиз мумкин».
Зиг Зиглер.

Ҳаётингизда эришадиган муваффақиятингиз ва мукофотланишингиз даражаси доимо сизнинг бошқа инсонларга ҳизмат қилишингиз даражасига тўғри пропорционалдир. Ўз меҳнатлари билан бой-бадавлат бўлган барча инсонларнинг асосий интилиши мижозларга сифатли ҳизмат кўрсатиш бўлган. Улар доимо ўз мижозлари эҳтиёжлари ҳақида ўйлаганлар. Улар мунтазам равища ўз мижозларига ҳизмат кўрсатишнинг энг яхши ва

оптималь усулларини қидирғанлар ва бу ишни бошқалардан күра яхширок бажарғанлар. Шунинг учун ҳам ўзингизга-ўзингиз мунтазам равища күйидаги саволларни беришдан асло чарчаманг:

- *Менинг миңсозларим нималарни ҳохлайдилар?*
- *Миңсозларим нималарни энг яхши деб ҳисобладилар?*
- *Мен миңсозлар учун яна нималар қила оламан?*
- *Қандай қилиб бу ишни бошқалардан күра яхшироқ амалга ошира оламан?*
- *Нега менинг миңсозларим бугун бошқалар билан мулокот қилдилар ва мен уларни яна ўз томонимга оғдириб олиш учун нималарни тақлиф қилишиим мумкин?*

Сизнинг ҳаётдаги муваффакиятингиз сиздан кутилаётган ишларни бажарганингиздан сўнг яна нималар қилганингизга тўғри пропорционалдир. Шунинг учун ҳам доимо сизга тўланганидан кўра кўпроқ иш қилиш имконини топинг. Миңсозларга кўпроқ эътибор қилинг ва улар учун қўшимча ҳизматлар кўрсатишга интилинг.

Сизнинг миңсозларингиз – сизнинг танлаган соҳангиздаги муваффакиятга эришишингизга бевосита боғлиқ бўлган барча инсонлардир. Демак, миңсозлар фақатгина сиз ҳизмат кўрсатадиган ёки сиздан бирор бир нарса сотиб оладиган инсонларгина эмас, балки улар жумласига сизнинг бошлиғингизни ва ҳамкарабаларингизни ҳам киритиш мумкин. Ундан ташқари, миңсозлар доирасига муваффакияти ёки қониқиши сизга боғлиқ бўлган инсонларни ҳам киритиш мумкин. Шунинг учун ҳам ҳар куни ўзингизга берадиган ва унга жавоб ахтарадиган бир муҳим савол келиб чиқади: *Миңсозлар учун ўз ҳизматларимнинг қимматлилигини янада ошириш учун мен бугун яна нима қила оламан?*

Ҳар куни қилаётган ишингизга бирор бир янгилик киритиш ва сизга боғлиқ бўлган инсонларга сифатли ҳизмат кўрсатиш учун имкониятлар қидиринг. Бу изланувлар натижасида топилган қайсиadir бир имконият ёки гоя сизнинг катта молиявий муваффакиятингиз сабаби бўлиб қолиши

мумкин. Шунинг учун мижозларга ҳизмат кўрсатишни яхшиловчи кичик-кичик янгиликларни қидириш ва ҳаётга тадбиқ килишни ҳеч ҳам тўхтатманг. Хозирги пайтда мижозлар тезкорлик билан ҳизмат кўрсатишни жуда юқори баҳолайдилар. Шунинг учун мижоз бирор бир нимани сўраганда «Албатта, дарҳол бажсарамиз» дейиш уларга жуда ҳам ёқимли бўлади.

МАШҚ

Компаниянгиздаги ва унинг ташқарисидаги барча энг муҳим мижозларни аниқлаб олинг. Кимлар сиз энг кўп боғлиқ бўлган одамлар жумласига киради? Кимлар сизга энг кўп даражада боғлиқ? Улар сизга яхшироқ эътибор берииши учун шу бугундан бошлаб нималар қила оласиз?

МУВАФФАҚИЯТНИНГ 11-СИРИ: ЎЗИНГИЗ ВА БОШҚАЛАР БИЛАН РОСТГҮЙ МУНОСАБАТДА БЎЛИНГ

«Фикр – барча турдаги бойликларнинг, барча муваффакиятларнинг ва барча буюк янгиликларнинг бошлангич манбаидир!».
Клод М.Бристол

Сиз ўзингизда ривожлантиришингиз ўта зарур бўлган энг асосий ва барча ҳурмат қиласиган сифат – ростгуйлик ва одамийликдир. Шунинг учун ҳам барча ишларингизда – тижорат ишларида ҳам, иш жойингизда ҳам ва уйингизда ҳам одамий ва ростгуй бўлинг. Ҳеч қачон ўзингизнинг одамийлик ва ростгуйлик фазилатларингизга шубҳа туғдирадиган ҳатти-ҳаракатлар қилманг. Шундай бўлсангиз, аввало жамоада, оилада ва фарзандлар тарбиясида бекиёс муваффакиятларга эришасиз. Агар бошқалар билан бизнес фаолиятини юритиш ҳақида сўз кетганда, сизнинг сўзингиз – давлат облигацияси каби ишончга сазовор бўлади, одамийлик фазилатингиз эса барча бошқа нарсалар қўйиладиган пойдевор каби бўлади. Ҳар қандай муваффакиятли фаолият ўзаро ишончга асосланган бўлади. Сизнинг бадавлат бўлиш йўлидаги ҳатти-ҳаракатларингиз муваффакияти сизга ишонган ва сиз билан биргаликда ишлайдиган, сизнинг яхши фазилатларингизни тан оладиган, сизга керакли маблағни бериб тура оладиган, сизнинг товар ва ҳизматларингизни сотиб оладиган ва қийинчилик пайтларда эса сизга ёрдам

бера оладиган инсонлар сони билан аниқланади. Одамийлик ва ростгуйликнинг биринчи калити - ҳеч нимани истисно қилмаган ҳолда ўз олдингизда ўзингизга-ўзингиз очиқ ва ойдин бўлишингиздир. Ўзингизга-ўзингиз ростгуй ва софдил бўлишингиз қилаётган ишингизни иложи борича яхшироқ бажаришга ундаиди. Одамийлик ва ростгуйликнинг иккинчи калити - ҳаётда у ёки бу сабабга биноан учрашаётган инсонлар билан очиқ ва дўстона мулокот қилишдадир. Агар бирор бир иш тўғрилигига, мақсадга мувофиқлигига ҳамда яхшилигига ишонмасангиз, у ҳақда гапирманг ва бу ишни зинҳор қилманг. Ҳеч қачон ўз одамийлигингиш ва ростгуйлигингишга доғ туширадиган ишлар билан шуғулланманг. Доимо юксак даражадаги инсонийлик нормалари асосида яшашга ҳаракат қилинг.

Сизнинг доимо ўзингизга-ўзингизга бериб туришингиз ва унга муносиб жавоб топишингиз лозим бўлган савол қуидаги бўлиши керак: «*Агарда дунёдаги ҳар бир инсон худди мендек бўлса, менинг атрофимдаги ҳаёт қандай бўлар эди?*» Бу савол сизни юқорироқ одамийлик стандартларига риоя қилишга ундаиди ва сизни бу борада янада юқори марраларни эгаллашга чақиради. Ҳар бир сўзингиз ва харакатингиз универсал қонун бўлиб қоладигандек фаолият кўрсатинг. Ўзингизни худди сизни доимо ҳамма кузатиб туроётгандек ва улар ҳам сизнинг ҳатти-ҳаракатларингиздан нусха ёки қолип олаётгандек тутинг. Сизнинг ҳақгуйлигингишга нисбатан шубҳа туғилганда бунинг тагига етишга урининг ва агар бу шубхаларда асос бўлса, буни ҳеч нимага қарамасдан тан олинг. Шундан сўнг эса ўз обруингизга путур етиш холларига асло йўл қўйманг.

МАШК

Агар ўзингиздаги одамийлик ва ҳақгуйлик принциплари асосида фаолият кўрсатсангиз, ҳаётингиздаги ҳар қандай муаммони ҳам бемалол ҳал қилишингиз мумкин. Сиздаги ушибу тамоиллар нималардан иборат? Сиз нималарга ишонасиз ва уларнинг қайси бирига риоя қиласиз? Балки сиз тушкунликка тушган ҳолатингизда бундай тамоилларнинг бирини шубха

остига қўйган бўларсиз. Лекин нима бўлишидан қатъи-назар, ўзингиз тўғри ва асосий деб билган тамойиллардан асло четга чиқманг.

МУВАФФАҚИЯТНИНГ 12-СИРИ: ЎЗИНГИЗНИНГ ҲАЁТДАГИ ЭНГ АСОСИЙ ВАЗИФАЛАРИНГИЗНИ АНИҚЛАБ ОЛИНГ ВА БУТУН КУЧИНГИЗНИ УЛАРНИ АМАЛГА ОШИРИШГА ЙЎНАЛТИРИНГ

«Ўз фикрида муҳим бўлмаган инсон бирор бир катта натижаларга эришиши мумкин эмас».
Фитрат

Қачонки сизда асосий вазифаларни пишиқ-пухта аниқлаб олиш ва уларни дарҳол амалга ошириш одати яхши ривожланса ҳамда бу одат тусига кирса, сиз ҳаётдаги истаган мақсадларингизга эриша олиш имкониятига эга бўлиб қоласиз. Ушбу асосий стратегияни амалга ошириш миллионлаб одамларнинг катта даромадларга, бойликка ва молиявий мустақилликка эришишларига асосий сабаблардан бири бўлган. Ўзингиз учун энг асосий вазифани танлаб олиш ва сўнгра уни амалга ошириш йўлида событқадамлик билан ҳаракат қила олиш қобилияти сизнинг иродангиз қучини, ўзингизни бошқара олиш имкониятингизни ва табиатингиз қатъийлигининг ўлчовидир. Ўзингизда бундай одатни хосил қила олиш жуда ҳам қийин, аммо агарда ҳақиқатан ҳам ҳаётда катта муваффакиятларга эришишни истасангиз, буни ўрганишингиз керак бўлади.

Қуйида сизга бундай ишларни амалга ошириш режаси келтирилади. Бирор бир мақсадга эришиш йўлидаги амалий ҳаракатлардан олдин бунинг учун нима ишлар қилишингиз лозимлигини тўла руйҳат кўринишида ёзиб чиқинг. Ундан сўнг, ҳар бир амалга оширилиши керак бўлган ишларга уларнинг қанчалик муҳимлик даражасига эга эканлиги ҳақида белгилар қўйиб чиқинг. Бундай ишни бажаришда ўзингизга қуйидаги тўрт саволни беришингиз керак бўлади:

1. Ушбу руйҳатдаги ишларнинг қайси бири мен учун жуда ҳам муҳим? Ёки бошқача қилиб айтганда, мўлжаллаган ишингизда ёки бизнесингизда бошқаларга нисбатан энг муҳим таркибий қисм нималардан иборат?
2. Мўлжалланган мақсадга эришиш учун қандай конкрет масалаларни ҳал қилишим керак бўлади?
3. Нималарни фақат мен ўзим бажаришим мумкин ва улар амалга оширилган такдирда улар қандай оқибатларга ҳамда ўзгаришларга олиб келади? Агар сиз бу ишларни амалга оширсангиз, бу сизга керакли бўлган ижобий ўзгаришлар олиб келади. Агарда буни бажармасангиз, кўзлаган мақсадингизга ҳеч қачон эриша олмайсиз.
4. Хозирда менинг вақтимни энг самарали жиҳатдан ишлатиш учун энг фойдали фаолият тури нималардан иборат? Ҳар бир вақтда бу саволга фақатгина битта жавоб бўлади. Ўз вақtingизни энг самарали тарзда ишлата олиш қобилияти – сизнинг юқори меҳнат унумдорлиги ҳамда катта молиявий муваффақиятга эришиш йўлидаги ўзига хос калитингиздир.

Шундай қилиб, энг асосий ишларни аниқлаб олинг ва улардан битта энг муҳимини 100 фоиз ҳажмда амалга ошириш йўлида тинимсиз фаолият кўрсатинг. Бунда бошқа ишларга асло чалғиманг. Бу иш батамом тугалланганидан сўнг, муҳимлик даражаси бундан кейинги ўринда турган ишни амалга оширинг ва ҳакозо. Бундай ишларни доимий равищда амалга оширишга кўникма хосил қилсангиз, сиз юқори даражада самарали ишлашни ҳам одат қилиб оласиз. Кейинчалик бу одат автоматик равищда амалга ошадиган бўлиб қолади ва бу сизга ҳаётингизда катта муваффақиятларга эришишни кафолатлаб беради. Шунинг ўзиёқ сизни бадавлат одам қилишга асосий сабаб бўлиши мумкин.

МАШК

Сизнинг ҳаётдаги бирор бир муҳим мақсадингизга эришишингизга ёрдам берииши мумкин бўлган ва хозирда ҳал қила олинадиган энг асосий

масала ёки муаммони аниқланг. Ундан сўнг бу иш 100 фоиз бажарила бўлинмагунча ўша юмуши билан шугулланишига ўзингизни мажбур қилинг. Агар бундай ишларни бажара олиши қобилиятингизни ривожлантира олсангиз, у сизнинг бутун ҳаётингизни тубдан ижобий томонга ўзгартириб юборади.

МУВАФФАҚИЯТНИНГ 13-СИРИ: ЎЗИНГИЗ ҲАҚИНГИЗДА ТЕЗКОР ВА ИШОНЧЛИ ҲИЗМАТЧИ ДЕГАН ФИКР ҲОСИЛ ҚИЛДИРИНГ

«Ўз ишингизни бажаринг ва ундан салгина ошириб ҳам бажаринг – бу билан сиз ўзингизни бошқаларга меҳнатсевар деб кўрсатасиз.

Бу озигина ошикроқ ишилаи сизнинг бошқа ҳамма ишингизга нисбатан кўпроқ эътиборга сазовор бўлиши мумкин».

Дин Бриггс.

Вақт – 21 асрнинг ҳақиқий валютасидир. Ҳозирги пайтда барча инсонлар қаергадир ва нимагадир шошиладилар. Мижозлар ҳам уларга салгина тезроқ ҳизмат кўрсатадиган фирмаларни афзал кўра бошлайдилар. Шунинг учун ҳам сизнинг асосий масалангиз – тезкор ва ишончли инсон сифатида ҳалққа танилишингиздир. Ўзингизда тезкор инсон ҳислатини ривожлантиринг ва дарҳол ҳаракат қилишга интилинг. Ҳосил бўлаётган имкониятларга тезда муносабат билдиринг. Инсонлар бирор бир нарсага муҳтоҷ бўлсалар ёки бирор бир нима истасалар – уларнинг бу истакларни қондириш учун тезроқ ҳаракат қилинг ва бунинг орқасида маълум бир маблағ ишлаб олинг. Ниманидир бажариш керак бўлса, тезкорлик билан бу ишни бажаринг. Агарда сизнинг бошлиғингиз ёки мижозингиз сиздан ниманидир сўрасалар, барча нарсани ташланг ва бу ишни шунчалик тез бажарингки, улар ушбу тезкорликдан ҳайратда қолсинлар. Тезкор ва ҳаракатчан инсонлар ўзларига кўплаб имкониятларни жалб қила оладилар ҳамда бундан ижобий равишда фойдаланишга муваффақ бўладилар. Улар кўплаб муаммоларни хал қиласидар ва бу ишларни бошқаларга нисбатан анча тез ҳамда сифатли ҳолда амалга оширадилар. Бу эса ўз навбатида уларнинг жамиятдаги мавқеларига ҳам жуда яхши таъсир кўрсатади ва уларни каттадан-катта муваффакиятлар сари етаклайди.

Агар сиз хозирги пайтда энг муҳим бўлган масалани танлаш ва уни тез ҳамда сифатли бажаришни уddyalай олсангиз, сиз ҳаётингизда жадаллик билан обру-эътибор ва муваффақиятларга эриша бошлайсиз. Сизнинг олдингизда шундай кўп йўналишлар ва имкониятлар очила бошлайдики, улар ҳақида сиз ҳозирги пайтда тасаввур ҳам қилиб кўролмайсиз.

МАШҚ

Сиз бошлий олмаётган ёки охирига етказа олмаётган бирор бир мұхим мұаммони танланғ үа дарҳол бу иши билан шуғулланиши ҳақида қарор қабул қилинг. Юқори дараҷсада интилиши үа тезкорликни таъминлаб берадилан түрт сеҳрли сўзларни доимий равишда тақрорланг: «Бу ишини ҳозироқ бажар! Бу ишини ҳозироқ бажар!»

МУВАФФАҚИЯТНИНГ 14-СИРИ: БИР ЧЎҚҚИДАН БОШҚА ЧЎҚҚИГА КЎТАРИЛИШГА ДОИМО ТАЙЁР БЎЛИНГ

*«Ғалаба баъзида эмас – доимо келиши шарт!»
Винс Ломбарди*

Сизнинг ҳаётингиз бир чўққига кўтарилигандан сўнг, иккинчисига кўтарилиш учун яна пастга тушишга мажбур бўлган альпинист каби кўтарилиш ва пастга тушишлардан, муваффақият ва муваффақиятсизликлардан иборат бўлади. Чунки «Ҳаёт – икки қадам олдинга ва бир қадам орқага бўлган каби жараёндир».

Барча турдаги ишбилармонлик фаолиятининг ҳаёт тарзи ўзгарувчан қисмлардан ҳамда ўзига хос тенденциялардан иборат. Уларда ҳам кўтарилиш ва пасайиш циклари мавжуд. Кўпинча бизнесдаги янги имконият ва тенденциялар бутун компания ёки фирмалар фаолиятининг тубдан ўзгаришига сабаб бўлиши мумкин. Мисол сифатида буни биз Интернетда кўришимиз мумкин, чунки ушбу технологиянинг барча соҳаларга жадал кириб бориши самарали бизнесни қандай қилиб ташкил қилиш ғояларини ва тушунчаларини тубдан ўзгартириб юборди.

Ўзингизда узоқ муддатли имкониятларни сезиш ҳиссини ривожлантиринг. Ҳар бир қилган ёки қилаётган ишингизга узоқ муддатли

перспектива нуқтаи-назаридан қаранг. Икки, уч, тўрт ва беш йил олдинга мўлжалланган режалар тузинг ҳамда қисқа муддатли ўзгаришларга унчалик катта аҳамият берманг. Ҳаётдаги барча нарса ва ҳодисалар ўзгариш тенденцияларига мойил ҳамда ўзига хос қайтарилиб туриладиган цикллардан иборатлиги ҳақида ўзингизга доимий равишда эслатиб туринг. Агар сизда уларнинг амалга ошиши учун ҳар куни муентазам равишда ишлаётган аниқ мақсадингиз ва режаларингиз бўлса, ҳаётингиз йиллар ўтган сайин олдинга ва юқорига ҳаракат қиласидиган бўлади. Бу эса сизнинг келажакдаги муваффақиятингиз гарови бўлиши аниқ.

МАШК

Ўз бизнесингиздаги асосий цикллар ва тенденцияларни аниқлаб олинг. Бозор қайси томонга қараб ҳаракат қиласиати ва ривожланаяпти? Сизнинг ишингизда нималар ўзгарайпти ва сиз бу ўзгаришларга нисбатан қандай қилиб мослашишингиз керак бўлади? Келажакдаги янги дунёнинг афзалликлари ва имкониятларидан фойдаланишига тайёр бўлиш учун сиз бугун нималар қила олишингиз мумкин? Жавобларингиз қандай бўлишидан қатъи-назар, ушбу ишларни хизироқ зудлик билан амалга оширинг!

МУВАФФАҚИЯТНИНГ 15-СИРИ: БАРЧА ИШЛАРИНГИЗДА ЎЗ-ЎЗИНГИЗНИ НАЗОРАТ ҚИЛИШНИ ОДАТ ҚИЛИНГ

«Ўз-ўзини назорат қилиши - бажараётган ишингизни
бу сизга ёқадими ёки йўқми,
бажаришга ўзингизни мажбур қилишидир». Эльберт Хаббард

Ўз-ўзини назорат қила олиш ва тартибга қатъий риоя қилиш – ўз меҳнати туфайли бадавлат бўлган инсонларнинг катта муваффақиятларга эришишларига сабаб бўлган жуда муҳим бир сифатидир. Агар сиз бу ишлар сизга ёки ёки ёқмаслигидан қатъи-назар режалаштирилган ишларни бажаришга ўзингизни мажбур қила олсангиз, сизнинг барча орзуларингиз амалга ошиши кафолатланади. Бадавлат инсон бўлиш учун дарҳол катта пул ишлаб олишга интилмасдан, бу ишни амалга ошириш учун узоқ муддатга мўлжалланган сифатли режага эга бўлиш керак. Бунинг маъноси шундан

иборатки, сиз ўзингизга моддий жиҳатдан мустақил бўлиш учун узок муддатга мўлжалланган режа тузиб олиб, ҳар бир кунлик ҳаёт тарзини ва ҳар бир сарф-харажатни келажакда ўша режани амалга оширишни кафолатлаш учун амалга оширишингиз керак. Яъни, ушбу режада кўзда тутилган барча тадбирларни изчил равишда ҳаётга тадбиқ қилишингиз лозим.

Ўз-ўзини назорат қилиш - мустақил бўлишни, жавобгарликни батамом зиммага олишни ва қўйилган мақсадга қараб доимий равишида интилишни ўз ичига қамраб олади. Омадли ва омадсиз инсонларларнинг орасидаги асосий фарқлардан бири шундан иборатки, омадлилар омадсизлар қилишни истамайдиган ишларни бажаришни уddyalай оладилар. Лекин бошқа томондан, омадсизлар қилишни истамайдиган ишларни омадлилар ҳам қилишни истамайдилар, аммо улар ҳаётда муваффақиятга эришишлари учун бу ишларни қилишга мажбур эканликларини жуда яхши тушунадилар. Бу уларнинг муваффақиятга эришиш ҳамда молиявий мустақил бўлиш учун тўлайдиган ўзига хос тўловлари эканлигини жуда ҳам яхши англайдилар. Муваффақиятли инсонлар кўпроқ уларни хурсанд қилувчи келажакдаги натижалар билан қизиқадилар, омадсизлар эса ҳозирги кунда бўлаётган ишлар билан кўпроқ қизиқадилар. Омадлилар мақсадга эришиш учун керакли бўлган ҳаракатларни амалга оширадилар, омадсизлар эса ички қийинчиликларни енгиш билан овора бўладилар. Омадлилар қийин, аммо керакли ва муҳим ишларни қиладилар, омадсизлар эса уларга дарҳол қониқиши келтирадиган осон ва ёқимли ишларни бажаришни ёқтирадилар.

Ўз-ўзини назорат қилиш жараёнининг ҳар бир ҳолати сизнинг бошқа ижобий сифатларингизни кучайтиради ва мустаҳкамлайди. Сиз ҳар гал ўз-ўзингизни назорат қилишни амалга оширганингизда сиздаги ўзингизга бўлган хурмат ҳиссиёти ҳам ортади. Натижада сиз ўзингизни янада севасиз ва астойдил ҳурмат қила бошлайсиз. Бу ишни қанчалик кўп марта амалга оширсангиз, сиз ҳаётдаги ва бизнесдаги турли хил янги имкониятлардан самарали фойдалана оласиз.

Эсингизда турсин, ҳаётдаги барча юз берәётган воқеа ва ҳодисалар – ўзига хос синовдан иборатдир. Ҳар сонияда, дақиқада, ҳар бир соатда, ҳар куни сиз узлуксиз равища ўз-ўзини назорат қилиш, нималаргадир риоя қилиш, ўз-ўзингизни бошқариш, тартибли бўлиш каби синовлардан ўтасиз. Бу синовлар натижасида сиз энг муҳим ишларни бажаришга ўзингизни мажбур қила оласизми ва улар билан шуғулланиб, ишни охирига етказа оласизми, бунга куч-қувват ва сабр топа оласизми? - каби бир қанча муаммолар ҳал қилинади. Ундан ташқари, бундай синовлар сиз ўз онгингизни ўзингиз интилаётган орзулар билангина банд қила оласизми, сиз учун унчалик муҳим бўлмаган фикрлар ва гаплардан четга чиқа оласизми, ўтмишда қолиб кетган муаммолар гирдобидан воз кеча оласизми? - каби саволларга ҳам аниқлик киритади. Бундай синовларнинг ҳар биридан муваффақиятли равища ўтганингиздан сўнг, сиз ривожланишнинг янги босқичига ўтасиз, яъни, олдинга суриласиз ва юқорига кўтариласиз.

МАШҚ

Доимий равишида ижобий томонга қараб ўзгаринг. Ҳаётингизнинг тартиб етишмаганилиги туфайли муваффақиятга эришиши қийинлашган қандайдир бир йўналишини аниқлаб олинг. Шу бугуноқ ҳаётингизнинг ушибу йўналишида тартибни мустаҳкамлашга имкон берадиган қарор қабул қилинг. Бунга жуда ҳам жиiddий ёндошинг. Ўз қарорингиз ҳақида бошқаларга маълум қилинг. Янги одатга бутунлай кўникишингиз учун тартибни бузшига олиб келадиган ҳеч қандай сабаб ва баҳоналарни тан олманг. Фақатгина шу қарорни қабул қилишингизнинг ўзиёқ ҳаётингизга жуда ҳам катта ижобий ўзгаришлар киритиши мумкин бўлади.

МУВАФФАҚИЯТНИНГ 16-СИРИ: ЎЗИНГИЗНИНГ ТАБИЙ ИЖОДИЙ ИМКОНИЯТЛАРИНГИЗНИ УЙГОТИНГ ВА ИШГА ТУШИРИНГ

«Тасаввур қилиши
далилларга нисбатан ҳам муҳимроқдир».
Альберт Эйнштейн.

Бу ерда биз сиз учун яна бир неча ажойиб янгиликларни билдиришимиз мумкин – сиз потенциал буюк инсон, даҳо ва генийсиз. Сиз ўзингиз тасаввур қилгандан ва ўйлагандан кўра анча ақллироқдирсиз. Сизда ҳозирги пайтгача ишлатганингиздан кўра ҳам кўпроқ миқдордаги ижодий имкониятлар ва интеллектуал кувват мавжуд. Нега бундай? Чунки бизнинг миямизда 10 миллиарддан ортиқроқ нерв хужайралари бўлиб, уларнинг ҳар бири 20 мингта бошқа хужайралар билан нейрон ва дендридлар орқали боғланган. Бунинг маъноси шундан иборатки, бизнинг миямиздаги хужайраларнинг уланиш комбинациялари сони бутун коинотдаги молекулалар сонидан ҳам кўпроқдир. Демак, бизнинг миямиз имкониятлари шу қадар каттаки, биз уни ҳатто тасаввур ҳам қила олмаймиз. Бизнинг муваффақият қозонишимиз ва бадавлат бўлишимиз учун керакли бўлган ғоялар ўйлаб топиш ва уларни амалга ошириш имкониятларимиз жуда ҳам кенг – яъни, улар мутлақо чексиздир, десак ҳам бўлаверади.

Сизнинг ижодий имкониятларингиз ривожланишига қуйидаги асосий уч фактор ижобий таъсир қиласди:

- *Сиз интенсив равишида интилаётган мақсадлар;*
- *Тўхтамиб қўйиб бўлмайдиган ишлар таъсири;*
- *Аниқ мақсадга йўналтирилган ва фокусланган муаммо ҳамда саволлар.*

Сиз ўз онгингизни қўйилган мақсадлар томон, муаммоларни ҳал қилиш томон ёки ҳаётингизга тегишли бўлган мураккаб саволларга жавоб топишга томон қанчалик кўп йўналтирангиз, ҳозирги пайтда шунчалик кўпроқ ижодий фикрлайдиган бўлиб қоласиз ва келажакда ҳам онгингиз сиз учун янада ёрқинрок, аникроқ ва яхшироқ ишлайди. Сизнинг миянгиз ва сизнинг ижодий рухингиз қандайдир мускул (*мушаклар*) тизимига ўхшашиб бўлади. Уни қанчалик кўп ишлатсангиз, у шунчалик кучли ва эгилувчан бўлиб бораверади. Агар кун бўйи ижодий равишида фикрлашни одат қилсангиз, сизнинг аклий қобилиятингиз ва интеллектуал коэффициентингиз янада кўпаяверади ҳамда сиз учун янги ва фойдали ғоялар ўйлаб топиш одат бўлиб

қолади. Эсингизда турсин – ижодий рух мукаммаллашувнинг бошқача бир номидир. Сизнинг миянгизга фаолият соҳангиз билан боғлиқ бўлган янги бир гоя ёки фикр келган пайтда сиз ўз ижодий потенциалингизнинг энг юқори чўққисида турган бўласиз. Жисмоний машқлар воситасида ўз мускулларингизни ривожлантирганингиз сингари, ақлингизни қаттиқ ишлатган пайтда сизнинг «ақлий мушакларингиз» ҳам ривожланади. Қуйида сизга интеллектуал кувватингизни ошириш ва ичингизда ўтирган генийни озодликка чиқаришга йўналтирилган машқ келтирилади. Бунинг учун битта тоза қофоз вараги олинг ва унинг тепа қисмида ўзингиз учун жуда муҳим бўлган мақсад ёки муаммони ёзинг. Масалан, сиз қуидагиларни ёзишингиз мумкин: «*Қандай қилиб мен кейинги икки-уч йилларда ўз даромадимни икки марта кўпайтиришим мумкин?*» Ундан сўнг ўзингизни тартибга солган ҳолда ушбу саволга камида 20 та турли жавоблар ёзиб чиқинг. Ушбу жавоблар орасидан энг маъқулини танлаб олинг ва уни амалга ошириш учун дархол сайъи-ҳаракатингизни бошланг. Олинган натижалар сизни ҳайратга солишига биз ишонамиз!

МАШК

Ўзингизнинг четга суриб бўлмайдиган муаммоингизни ёки эришишини жуда ҳам истаган мақсадингизни қогозга ёзиб чиқинг. Кейин ушбу муаммо ҳал бўлган деб ёки ушбу мақсадга тўла эришилган деб фараз қилинг. Бу ечим ёки эришилган мақсад қандай бўлишини тасаввур қилинг. Шундай натижаларни олиш учун сиз ҳозироқ нималар қилишингиз мумкин? Эсингизда турсин – кўзланган мақсад томон муттасил ҳаракат қилиши орқалигина барча нарсага эришиши мумкин!

МУВАФФАҚИЯТНИНГ 17-СИРИ: ЎЗИНГИЗ ЁКИ ИШ ФАОЛИЯТИНГИЗ УЧУН КЕРАКЛИ БЎЛГАН ИНСОНЛАР БИЛАН КЎПРОҚ БИРГА БЎЛИНГ

«Беш йилдан сўнг сиз ҳудди ҳозирдагидек одам бўласиз, аммо сизда бу давр давомида учрашган инсонларингиз ва ўқиган китобларингизнинг ўзига хос таъсири ҳам бўлади».
Чарли Джонс.

Сизнинг ҳаётдаги муваффақиятларингиз ва бахтингизнинг 85 фоизидан кўпроғи шахсий ва амалий ҳаётингиздаги инсонлар билан ўзаро муносабатингиз сифатига боғлиқ бўлади. Сиз қанчалик кўп инсонларни танисангиз ва улар сизни ижобий жиҳатдан танисалар, сиз шунчалик кўпроқ муваффақиятларга эришасиз, тан олинасиз ва шунчалик тезроқ олдинга суриласиз. Ҳаётингизнинг деярли ҳар бир бурилиш нуқтасида сизнинг олдингизда сизга ёрдам берадиган ёки сизга ҳалақит берадиган одамлар пайдо бўладилар. Муваффақиятга эришган инсонлар бутун ҳаётлари давомида турли хил инсонлар билан юқори сифатли алоқалар ўрнатадилар, бу алоқаларни мустахкамлайдилар ва давом эттирадилар. Бошқалар эса ҳар куни кечки пайт уйларига кетадилар ва оила даврасида телевизор кўриб ёки мусиқа эшишиб ўтираверадилар. Бу эса уларни дунёқарашлари ва инсонлар билан алоқалари ўта чегараланган бўлишига олиб келади. Ҳаётдаги барча воқеа ва ҳодисалар у ёки бу томондан инсонлар орасидаги муносабатларга боғлиқ. Ҳаётингизда сиз рўбару келаётган деярли барча муаммолар сизга мос келмаган инсонлар билан номаъкул бўлган алоқаларга киришиш натижасида юзага келади. Худди шундай тарзда, ҳаётингизда эришган барча муваффақиятларингиз керакли инсонлар билан керакли вақтда ва керакли жойда ажойиб муносабатлар ўрнатилиши туфайли амалга ошади. Улар сизга баҳоли-кудрат ёрдам берадилар, сиз эса ўз навбатида уларга ҳам керакли бўлган ёрдамни кўрсатасиз. Муваффақиятингизнинг 90 фоизидан кўпроғи илмий тил билан айтганда, сиз мансуб бўлган «референт гуруҳ» томонидан аниқланилади. Бу референт гурухни сиз билан кўп вақт мобайнида биргаликда бўладиган ва вақтингизнинг асосий қисмини улар билан ўтказадиган инсонлар гуруҳи ташкил қиласи.

Бизнинг ҳар биримиз ҳамелеонга ўхшаб (*ўз рангини шароитга қараб ўзгартирадиган маҳлуқ*) кўп вақт мобайнида биргаликда бўлган инсонлардан турли руҳий ҳолатларни, ўз-ўзини тутиш қоидаларини, нималаргадир ишончни, жамоа аъзолари билан мулоқот қоидаларини ва бошқа турли хил ҳолатларни ўзлаштириб оламиз. Шунинг учун агар сиз муваффақиятга

эришишни истасангиз, ижобий инсонлар гурухи билан дўстлик алоқаларини ўрнатинг. Бахтли, оптимист, аниқ мақсадга эга, ҳаётда юқорига ва олдинга интилевчан инсонлар билан ўртоқлик алоқаларини ўрнатинг ва уни иложи борича мустаҳкамланг. Салбий, негатив, аламзада, доимо шикоятлар қилувчи ва асабий инсонлар билан мулоқотга киришишдан узоқроқ бўлинг. Чунки, агар сиз бургутларга ўхшаб, кўкларга учмоқчи бўлсангиз, индюклар билан биргаликда бўлиш мақсадга мувофиқ эмас, албатта. Ўз меҳнати оркали бойбадавлат бўлган инсонлар бошқалар билан доимо мулоқотда бўладилар ва бу мулоқот оркали янги ҳамда фойдали маълумотларга эга бўладилар, танишлар орттирадилар ҳамда шу туфайли янги ва перспектив бизнес йўналишлари ҳақида бошқалардан олдинроқ билиб оладилар. Улар савдо ва ишлаб чиқариш уюшмалариға кирадилар, уларнинг ҳар бир йиғилишларида фаол иштирок қилиб, ўз референт гурӯҳлари ишларида фаол қатнашадилар. Улар бизнесга бағишлиланган учрашувлар, тақдимотлар, кўргазмалар, анжуманлар, қабул маросимларида турли хил инсонлар билан танишадилар, улар билан ташриф карточкаларни алмашинадилар, ҳамсуҳбатлариға ўзлари ҳақида, нима билан шуғулланаётганликлари тўғрисида ва нималарга қизиқишлари ҳақида сўзлаб берадилар ҳамда уларнинг ишлари билан яқиндан танишадилар. Янги инсонлар билан учрашганингизда амалга оширишингиз мумкин бўлган энг яхши стратегиялардан бирини қуида изҳор қиласиз. Янги ҳамкорлар ёки тадбиркорлар билан учрашганда улардан қайси йўналишларда ишлашларини, нималар билан шуғулланишларини, уларнинг бизнеси нималардан иборат эканлигини сўзлаб беришларини илтимос қилинг. Айниқса, уларга истеъмолчи ёки мижозларни жўнатиш учун сизга керакли бўлган маълумотлар билан қизиқинг. Ундан сўнг, уларнинг бизнесига қандайдир бир кўринишда ёрдам бера оласизми ёки йўқми эканлигини ўрганиб чиқинг. Сиз кўпчилик олдида ниманидир оладиган инсон бўлгандан кўра, кўпроқ нимадир берадиган инсон бўлганингиз маъкул. Доимо бошқаларга қандайдир йўл билан қандайдир амалий ёрдам бериш йўлини ахтаринг. Ундан сўнггина вақти-соати келганда, бу инсонлар сизга

ҳам керакли бўлган ёрдамни кўрсатишади. Инсонлар билан дўстона мулоқотга киришиш ва ўзаро алоқаларни мустаҳкамлашнинг энг яхши йўли уларнинг мақсадларида ёрдам бериш имкониятларини ахтаришдир. Ҳеч нима талаб қилмасдан туриб, инсонларга қанча кўп нарса ёки ёрдам берсангиз, хурмат-эътибор орттирасиз ҳамда сизга кутилмаган вақтда ва кутилмаган манбаълардан шунча кўплаб миқдорда ўзига хос мукофотлар келади ва ишларингиз ҳам ўз-ўзидан ривожланиб кетади.

МАШҚ

Хозирги пайтдаги ва келажакдаги ҳаётингиздаги энг муҳим инсонларни аниқлаб олинг. Уларнинг ишига ва шахсий ҳаётига қандай кўринишиларда ёрдам бера оласиз? Нималар килсангиз, улар ҳам сиздан миннатдор бўлишади ва шунинг учун ҳам керакли пайтларда сиздан ўз ёрдамларини аяшимайди? Яқиндан танишишингиз керак бўлган инсонлар ҳақида ҳам яхшилаб ўйлаб кўринг. Улардан ёрдам сўрамасдан аввал, улар учун нималар қила олардингиз? – шу ҳақда ҳам яхшилаб ўйлаб кўринг. Эсингизда бўлсин – қандайдир хосил олиши учун энг олдин ниманидир экши керак бўлади!

МУВАФФАҚИЯТНИНГ 18-СИРИ: ЎЗИНГИЗНИНГ СОҒЛИФИНГИЗГА АЛОҲИДА ЭЪТИБОР БЕРИНГ

*«Бахт калити – соғлом танда соғлом руҳлигидадир!»
Теодор Рузвельт*

Биз инсоният тарихининг энг ажойиб даврида яшаяпмиз, чунки бу пайтда аҳолининг жисмоний ҳолати ва умри узунлиги олдинги пайтларга қараганда анча юқори даражада бўлиб қолган. Хозирги пайтларда олдингиларга нисбатан кўпроқ ва соғлом яшаш имкониятлари мавжуд. Сиз саксон, тўқсон ёхуд юз ёшгача соғлом ҳолда яшашга ҳаракат қилишингиз керак. Агар шундай қарор қабул қилган бўлсангиз ва саломатлик учун керакли бўлган амалларга оғишмай риоя қилсангиз, бунга сизнинг кучингиз bemalol етади. Аввало, ўз олдингизга саксон ёшгача яшайман, деган мақсад кўйинг. Ундан сўнг соғлифингизга салбий ёки ижобий таъсир кўрсатадиган

хозирги одатларингизни таҳлил қилинг. Сўнгра ўзингиздан-ўзингиз сўранг: «Хозирги пайтдаги турмуши тарзим соғлом тарзда саксон ёшгача яшаш имконини берадими?» Сўнгра ёмон ва соғлифингизга салбий таъсир кўрсатадиган одатларингизни ташлаб, яхшиларига ўрганинг ва буларга доимо амал қилинг. Узок, соғлом ва баҳтли яшашнинг уч асосий қоидаси мавжуд. Уларнинг биринчиси – танангиз вазнини маълум даражада (*нормада*) сақлаш ва ундан сўнг, ҳаётнинг қолган қисмида ҳаракатчан ҳамда жисмоний жиҳатдан бақувват бўлишдир. Бу амални қуйидаги сўзлар орқали ифодалаш мумкин: «*Камроқ овқат ейиши ва кўпроқ жисмоний машгулотлар билан шугулланиш лозим*».

Иккинчи қоида - тўғри танланган диетага риоя қилиш, яъни, энг яхши озиқ-овқат махсулотларини етарли даражада ва камроқ миқдорда истеъмол қилиш. Калорияси камроқ бўлган оқсилларни, мева ва сабзавотларни истеъмол қилинг. Рационингиздан ширин десертларни, алкоголли ва алкогольсиз ичимликларни, конфетларни ҳамда таркибида шакар бўлган барча махсулотларни чиқариб ташланг. Тузни меъёрида истеъмол қилинг ва оқ буғдой унидан тайёрланган махсулотларни еманг. Овқат ейиш порцияларини камайтиринг ва кунига одатдагидек уч маҳал ўрнига 4-5 марта кам-камдан овқатланинг. Овқатланишдаги ўз одатларингизни яхши назорат қила олсангиз, ҳаётингизнинг бошқа соҳалардаги одатларингизни назорат қилишингиз ҳам анча осон кечади.

Узок ва соғлом тарзда яшашнинг учинчи қоидаси – етарли хажмдаги жисмоний машқлар бажаришдир. Бунинг маъноси шундан иборатки, ҳар ҳафтада жисмоний машқлар бажаришга 200 дақиқа ажратиш ёки кунига ўртacha миқдорда 30 дақиқадан ажратишдир. Сизга керакли бўлган жисмоний машқлар хажмини тўлиқ бажариш учун ҳафтасига 3-5 мартадан 30-60 дақиқа давом этадиган ҳаракатчанлик билан пиёда юришлар ҳам етарли бўлади. Агар ушбу масалага масъулият билан ёндошсангиз, у ҳолда саломатлик клубига ёзилишингиз ёки уйга тренажерлар сотиб олишингиз мумкин. Бу сизга жисмоний машқлар билан фаол ва доимий равишда шуғулланиш

имконини яратади. Аъло даражадаги соғлиқ ва узок ҳаётнинг сири – сизнинг хозирги пайтдаги жисмоний тайёргарлигингиз ҳамда саломатлик ҳолатингизга мос бўлган аниқ ва равшан мақсадлар қўя олишдир. Шундан сўнг сиз ушбу мақсадларингизни амалга ошириш учун тегишли режа тузишингиз ва унга ҳар куни қатъий риоя қилишингиз керак бўлади. Соғлиқни мустаҳкамлашга йўналтирилган бундай мажбурият ўз-ўзини назорат қила олишни, тартибга риоя қила олишни, мустаҳкам иродани ва ўзини бошқара олишни талаб қиласиди. Лекин олинадиган натижа – саломатлик, узок, соғлом ва баҳтли ҳаёт маъносида ҳам жуда ажойиб бўлади. Агарда сизнинг молиявий мақсадингиз катта бойликка эришиш бўлса, саломатлик йўналишидаги мақсадингиз - иложи борича узок умр кўриш ва орттирган бойлигингиз гаштини суриш бўлиши керак бўлади.

МАШК

Саломатлик йўналишидаги соглигингизни мустаҳкамлашга ва ҳаётий кучингизни оширишига ҳалал берадиган ҳамда ўзингизнинг тарк этишингиз керак бўлган битта конкрет одатни аниқланг. Масалан, бу саломатликка зарар келтирадиган чекишидан, десерталардан ва шакарли маҳсулотлардан тамоман воз кечиши бўлиши мумкин. Бу муаммога жиддий ёндошинг ва саломатлик соҳасидаги ушбу янги одатингизни мустаҳкамлаш ва ҳаётингиз нормасига айлантириши учун чекишини, десерталар ва шакарли маҳсулотлар истеъмол килиши одатини батамом тарк этишига киришинг.

МУВАФФАҚИЯТНИНГ 19-СИРИ: ФАОЛ, ҚАТЪИЙ ҚАРОРЛИ ВА ҲАРАКАТЧАН ИНСОН БЎЛИШГА ИНТИЛИНГ

«Тинимсиз ҳаракатчанлик ва қурашии орқали барча нарсаларга эришии мумкин». Уильям Шекспир

Ўз меҳнатлари орқали бадавлат бўлган инсонларнинг яна бир ажойиб хусусиятлари шундан иборатки, улар хозирги пайтдаги ҳолатни яхшилаб ўрганиб чиққанларидан сўнг, дархол керакли қарорларни қабул қиласидилар. Улар ўзларини мақсадга томон тезда ҳаракат қилиш ва қарорларини оғишмай амалга оширишга ўргатганлар. Улар тезкорлик билан ҳаракат қилиб, ҳатти-

ҳаракатлари натижаси бўлган тескари алоқа маълумотларини оладилар ва агар янгишганларини билиб қолсалар, уни тезлик билан тузатишга интиладилар ёки ижобий натижага эришишга имкон берадиган бошқа бирор бир ҳаракат қилишга уринадилар. Сиз учун муваффақиятга эришишнинг яна бир муҳим шарти – мумкин бўлган хилма-хил бизнес имкониятларини синаб кўришдир. Муваффақиятга эришган инсонлар доимо қарорларида қатъий бўладилар ва улар бошқа инсонларга нисбатан кўпроқ турфа хил бизнес имкониятларини синаб кўрадилар ҳамда ўта ҳаракатчан бўладилар. Эҳтимоллик назариясига кўра, сиз муваффақиятга эришиш мумкин бўлган қанча кўп усулларни синаб кўрсангиз, омадингиз келиши имкониятлари ҳам шунчалик кўпаяверади ва охир-оқибат сиз ўзингизга мос келадиган бизнесни топиб оласиз ҳамда уни тезлик билан ривожлантирасиз.

Омадсиз инсонлар беқарор бўладилар, улар нима қилишлари кераклигини билгандай бўладилар, аммо бирор бир натижага эришиш, қатъий қарорлар қабул қилиш ва фаол ҳаракат қилишга иродалари ёки руҳий кучлари етмайди. Натижада улар ҳаёт қаерга йўналтиrsa, секинлик билан бир маромда ўша ерга кетаверадилар ва ҳеч қачон баҳт, муваффақият ва омадга эришма олмайдилар. Бундай одамлар ҳеч қачон бой-бадавлат бўлиб, том маънодаги молиявий мустақилликка ва эркинликка эриша олмайдилар. Улар ўз имкониятлари даражасидаги муваффақиятларга ҳам эриша олмайдилар ва бунга индамай рози бўладилар. Қачонки сиз қатъий ва ҳаракатга йўналтирилган бўлсангиз, бутун ҳаётингизни тезлаштириб юборасиз ва муваффақиятларга тезроқ фурсатларда эришасиз. Сиз бир кун мобайнида бошқа инсонларга нисбатан кўпроқ иш қила оладиган бўлиб қоласиз. Сиз бошқаларга нисбатан тезкор ва ҳаракатчанроқ бўлиб қоласиз. Чунки сиз қувват, интилиш ва энергиянинг кучлироқ манбаъсига уланиб қоласиз ва бунинг натижасида сизда қувонч ҳамда интилувчанлик ҳам бениҳоя кучайганини сеза бошлайсиз. Ушбу позитив энергия эса сизни мақсадларингиз томон янада тезроқ ҳаракат қилдиради. Бу жуда ажойиб, шундай эмасми?

М А Ш Қ

Ўз-ўзингизга қуидаги саволни беринг: «Қандай биргина ҳатти-харакатни хозироқ бажарсам, у менинг эришадиган натижаларимга позитив (ижобий) равишда таъсир қиласы?» Ушбу саволга жавобингиз қандай бўлишидан қатъий назар, бундай ҳаракатни дарҳол амалга оширинг!

МУВАФФАҚИЯТНИНГ 20-СИРИ: МУВАФФАҚИЯТСИЗЛИК ҚАБУЛ ҚИЛИНА ОЛИНАДИГАН ВАРИАНТ БЎЛИШИГА ҲЕЧ ҚАЧОН ЙЎЛ ҚЎЙМАНГ

*«Кўрқувнинг ўзидан бошقا ҳеч нимадан қўрқмаслик керак».
Франклін Д. Рузвельт.*

Муваффақиятсизликдан қўрқиши – муваффақиятга эришиш йўлидаги энг катта тўсиқлардан биридир. Муваффақиятсизликнинг ўзи инсонни кучлироқ, қатъий қарорли ва мослашувчан қиласи. Аммо муваффақиятсизликдан қўрқиши сизнинг фикрларингиз ҳамда ҳатти-харакатларингизни шол (*паралич*) қилиб қўяди ва катта муваффақиятларга эришиш мумкин бўлган ҳаракатларни ва ишларни қилишдан сизни батамом тўхтатиб қўйиши мумкин. Кунлардан бир куни ёш журналист IBM фирмасининг асосчиси бўлган Томас Дж. Уотсондан қандай қилиб тезроқ муваффақиятга эришса бўлади, деб сўради. Уотсон унга қуидаги ажойиб сўзлар билан жавоб берди: «*Агар сиз тезроқ муваффақиятга эришимоқчи бўлсангиз, муваффақиятсизликларингизнинг юз берии частотасини икки баробар оширинг. Чунки муваффақият омадсизликнинг қарама-қарши, тескари томонида туради*».

Шунинг учун ҳам сиз олдинга интилишга қуч, иродада ва имкон топинг, муваффақиятсизликлардан чўчиманг. Ўз меҳнатлари орқали бадавлат бўлган инсонлар яхшилаб ўйланган ва ҳар томонлама ҳисоб-китобга асосланган таваккалчиликка доимо тайёр бўладилар, чунки бу амал уларга қўйилган мақсадларига эришишга ҳамда юқорироқ фойда кўришга имкон беради. Таваккалчиликка нисбатан сиздаги рухий ҳолат сизнинг бойиб кетишга

тайёрлигингизнинг энг асосий кўрсатгичидир, десак, янгишмаган бўлар эдик. Ҳар гал таваккалчилик билан боғлиқ бирор бир ҳолатга дуч келсангиз, ўзингизга қуидаги саволни беринг: «*Агар мен олдинга юрсам, қандай энг ёмон ҳолат юз берииши мумкин?*» Кейин эса нефть соҳасидаги миллиардер Пол Геттига ўхшаб, бу энг ёмон ҳолат ҳеч қачон юз бермаслигини кафолатлашни ўз мақсадингиз деб эълон қилинг. Ҳар ким ҳам муваффақиятсизликдан, касод бўлишдан ва камбағалликдан жуда ҳам қўрқади, албатта. Шунинг учун ҳам ҳар бир инсон ҳато қилиб қўйишдан ва бунинг натижасида ишлари орқага кетишидан қаттиқ чўчиди. Лекин ўз меҳнати оркали бадавлат бўлган инсонлар онгли равида бундай қўрқувга қарама-қарши туриб, исталган пайтда керакли ишларни амалга оширадилар. Бу хакда Ральф Уолдо Эмерсон бундай деб ёзган: «*Бутун ҳаётингиз давомида ўзингиз қўрқкан ишларни қилишини одат қилинг. Агарда қўрқкан ишларингизни қиласверсангиз, сиздаги қўрқув албатта ўлади*»

Агар сиз қўрқмасдан ҳаракат қилсангиз, сизга қандайдир кўзга кўринмас кучлар ёрдамга келади ва сизнинг қўрқув билмасдан қилган ҳар бир ишингиз сиздаги шижаотнинг ўсишига ҳамда келажакда янада кўпроқ ботирлик намоён қилишингизга олиб келади. Муваффақиятга эришишга кафолат бўлмаган ва олдинга силжишга мўлжалланган ҳар бир ҳатти-ҳаракатни амалга оширганингизда сиздаги қўрқув тобора камая боради ҳамда ўзингизга бўлган ишонч борган сари кучаяверади. Охир-оқибат шундай ҳолатга эришасизки, бунда энди сиз ҳеч нимадан қўрқмайдиган бўлиб қоласиз. Бунга нисбатан «*Аполло-13*» фильмидаги капитан Юджин Кранц жуда ҳам оғир бўлган ҳолатда айтган қуидаги сўзларини мисол қилиб келтиришимиз мумкин:

«*Муваффақиятсизлик деган ҳолат биз учун мавжуд эмас!*»

Сизнинг асосий эзгу мақсадингиз - ўз меҳнати оркали бой-бадавлат бўлган инсон бўлишdir. Бунинг учун ўз олдингизга бу билан боғлиқ бўлган аниқ мақсадлар қўйишингиз, уларни ёзиб олишингиз ва ҳар куни уларга эришиш учун тиним билмай ишлашингиз лозим бўлади. Бу ишларни амалга

ошираётганингизда сиз дуч келаётган муаммолардан кўрқаслигинги керак ва доимо ўзингизга «Мен учун муваффақиятсизлик ҳолати мавжуд эмас!» деб эслатиб туришингиз зарур бўлади. Бундай рухий ҳолат бошқа барча факторларга нисбатан кўпроқ миқдорда сизнинг узок муддатли муваффақиятингиз гарови бўлиб ҳизмат қилади.

МАШК

Кўркувнинг ўз ҳаётингиздаги энг асосий манбаъини аниқланг. Ушибу манбаъ, масалан, мұваффақиятсизлик, омадсизлик ёки сизнинг ишингизни бошқалар томонидан қўллаб-қувватламаслик холлари бўлиши мумкин. Кўрқув манбаъини аниқлагандан сўнг, уибу қўрқув йўқ бўлган каби ҳаракат қилишига қарор қабул қилинг. Агар сиз ўз мақсад ва орзуларингизга эришишига йўналтирилган конкрет ҳаракатлар қиласангиз, ўзингизга мұваффақиятга эришиши кафолатланган деб фараз қилинг ва бунга астойдил ишонинг. Ундан сўнг эса керакли амалларни бажаринг!

МУВАФФАҚИЯТНИНГ 21-СИРИ: ТИРИШҚОҚ ВА ИНТИЛУВЧАН БЎЛИНГ

«Ҳеч нарса тиришиқоқликнинг ўрнини боса олмайди.

*Иқтидор унинг ўрнини боса олмайди,
чунки иқтидорли омадсизлар жуда ҳам кўплаб учрайди.*

*Даҳолик ҳам унинг ўрнини боса олмайди,
чунки ҳеч нимага эриша олмаган даҳолар ҳам етарли.*

*Билим ҳам унинг ўрнини боса олмайди,
чунки билимли қашишоқлар ҳам жуда кўп.*

Фақатгина тиришиқоқлик ва қатъийлик ҳар нарсага қодирдир!»

Калвин Кулидж.

Тиришқоқлик – инсон характерининг энг асосий кўрсатгичидир. Инсонга тиришқоқлик, худди пўлатга углерод керак бўлгани каби ўта муҳимдир. Бу шунчалик муҳим кўрсатгички, ҳаётдаги ҳар қандай мұваффақият ҳам усиз амалга оширилина олинмайди. Тиришқоқликнинг ва мұваффақиятнинг энг катта сирини куйидагича ифодалаш мумкин: Ўз миянгизни ва онгингизни омадга эришиш йулида албатта дуч келинадиган мұваффақиятсизликлар ва асабийлашишлардан аввалроқ керакли тиришқоқлик даражасига мослаб қўйинг. «Нима бўлишидан қатъий назар,

ҳеч қачон таслим бўлмайман!» - деган маънода қатъий қарор қабул қилинг ҳамда бунга албатта амал қилинг. Муаммо ёки қийинчиликлар билан тўқнашганингизда сизда буларни енгиш учун етарли бўлган тиришқоқликни ривожлантириш учун вақт бўлмайди. Аммо агар сиз бизнесингизда муваффақиятсизликлар ва қийинчиликлар бўлиши муқаррарлигини режалаштирангиз, уларга дуч келган пайтингизда сиз ушбу ҳолатга руҳий жиҳатдан тайёр бўласиз ҳамда бундай ҳолатлар албатта руй беришини сиз олдиндан биласиз. Ёмон ҳолатга ёки муваффақиятсизликка дуч келинганида тиришқоқлик ва ҳаракатчанликни сақлаб қолиш ҳар қандай ишда ҳам муваффақиятни кафолатлаб берадиган ажойиб ҳислатдир. Сизнинг энг катта шахсий активингиз бошқаларга нисбатан кўпроқ тиришқоқлик қила олиш бўлиб қолиши ҳам мумкин. Нафсиамбирини айтганда, тиришқоқлик ҳислати сизнинг ўз-ўзингизга ишончингиз меъёри ва муваффақиятга эриша олишингиз кўрсатгичидир. Эсингизда турсин - бутун ҳаёт бу ўзига хос бўлган синовдан ўтишдир. Катта муваффақиятларга ва омадга эришиш учун сиз тиришқоқлик тестидан (*текширувидан*) ўтишингиз керак бўлади. Лекин бундай текширув кутилмаган пайтда сиз учун қўққисдан амалга ошади. Мураккаб вазият исталган пайтда, исталган жойда ва кутилмаган ҳолатда юз бериши мумкин. Сиз кутилмаган қийинчиликларга дуч келган пайтингизда, турли хил қризислар пайтида ёки турмуш муаммоларини ҳал килиш чоғида тиришқоқлик тестидан ўтасиз дейиш ҳам мумкин. Худди шундай ҳолатларда сиз атрофдагиларга ўзингизнинг ким эканлигини намойиш қиласиз.

Ҳаётимизнинг доимий жиҳатларидан бири ғ доимо қайтарилиб турувчи кризислардир. Агарда сиз ҳодисалар билан тўлиқ ҳаёт кечирсангиз, ҳар икки ёки уч ойларда кризисларга дуч келасиз. Ушбу кризислар оралиғида эса майда-чуйда муаммо ва қийинчиликларга ҳам дуч келиниб турилади. Сизнинг эришмоқчи бўлган мақсадларингиз қанчалик катта бўлса ва сиз бойбадавлат бўлиш учун қанчалик даражада қатъий қарор қабул қилган бўлсангиз, сиз шунчалик кўп муаммо, қийинчилик ва кризисларга дуч келасиз. Бунда ўзингиз бошқара олишингиз мумкин бўлган бирдан-бир

фактор – пайдо бўлаётган қийинчилик ва муаммоларга ўзингизнинг муносабатингиздир. Бу ҳолатларга ижобий ва конструктив тарзда муносабатда бўлсангиз, ҳар гал сиз қучли ва яхшироқ бўла борасиз ҳамда кейинги пайдо бўлаётган муаммо ва қийинчиликларни ҳам нисбатан осонроқ ҳал қила оласиз. Охир-оқибат ҳаётингизда шундай даражага ва ҳолатга эришасизки, энди сизни тўхтатиш мумкин бўлмай қолади. Бунда сиз худди табиатнинг бошқарувсиз қолган кучларидан бири бўлиб қоласиз, чунки энди сизни енгиб бўлмайди. Сиз қийинчиликлар қандай бўлишидан қатъий назар, ўз ўйлаганидан воз кечмайдиган ўжар инсонга айланасиз. Йўлингизда қандай қийинчиликлар учрамасин, сиз уларни ҳал қилиш, енгиш йўлини албатта топа оласиз. Исталган вазиятда ҳам сиз фақат олға интиласиз ва сизни ҳеч нима тўхтата олмайди.

М А Ш Қ

Хозирги пайтда сизнинг олдингизда турган энг мураккаб ҳаётий ҳолат нима? Бу ҳолат қандай бўлишидан қатъий назар, сиз уни ўзингиз учун фойдали сабоқ сифатида юборилган деб фараз қилинг. Бу ўзига хос дарс сабоги мисолида сиз келажакда яна ҳам омадли бўлишини ўрганасиз. Бу дарснинг моҳияти нимада бўлиши мумкин? Бундан сўнг доимо ҳар бир қийинчиликни қандайдир фойдали сабоқ ва синов сифатида қабул қилинг ва ундан тегишили хулосалар чиқаринг. Бундай хулосалар ва сабоқлар сизнинг бой-бадавлат бўлиши йўлидаги ҳатти-ҳаракатларингизда анчагина кўмак беради. Ушбу китобни ўқиб бўлганингиздан сўнг, сизда қуийидаги ҳулоса ҳосил бўлиши керак:

Муваффақиятга эришишни башорат қилиш мумкин!

Ушбу китобчанинг асосий ғояси ҳам «Муваффақиятга эришишни башорат қилиши мумкинми?» деган саволга жавоб топиш эди. Том маънодаги муваффақият – керакли пайтда керакли жойда керакли одамлар билан учрашиш, ёғли ишга жойлашиш, омади келишлик, лоторея ютгандек тасодифий ҳолатларга ўхшаш эмас. Муваффақиятга бамисоли қуёш шарқдан чиқиб, ғарбга ботгандек аниқ ва равshan қоидаларга амал қилган ҳолда

эришиш мумкин. Агар сиз ушбу китобчада ёритилган ва сиз танишиб чиққан принципларга оғишмай амал қилсангиз, ҳаётда катта муваффақиятларга эришишингиз мумкин бўлади. Сиз ушбу принцип, қоида ва усулларни билмайдиган ёки уларни билса ҳам ўз амалий фаолиятида қўлламайдиган инсонларга нисбатан жуда катта афзалликларга эга бўласиз. Бундай афзалликка эга бўлган ҳолда сиз ўз ҳаёtingиз давомида шубҳасиз унинг капитани бўласиз, яъни, ғалаба қилувчилар тоифасига мансуб инсон бўлиб қоласиз. Агар сиз доимий равишда, систематик тарзда ва тиришқоқлик билан ушбу китобчада ёритилган ҳамда бошқа омадли ва бадавлат инсонлар оғишмай риоя қилаётган амалларни кам-кўстсиз бажарсангиз, ҳаётда ҳеч нима сизнинг катта муваффақиятларга эришишингизда ҳалақит берга олмайди. Сиз – ўз ҳаёtingиз штурвалида ўтирибсиз, шунинг учун уни қандай қилиб бошқариш масалалари батамом сизнинг қўлингизда. Сизнинг нималар қила олишингиз, ким бўлишингиз ва нималарга эга бўла олишингизга ўзингизнинг ичингизда бўлган ва фикрловингиз туфайли пайдо бўлган чегараловлардан бошқа ҳеч қандай чегараланишлар йўқ !

Эсингизда турсин – сиз ўз йўлингизда учратган ҳар қандай инсондан ҳеч жиҳатдан ёмон эмассиз, балки ундан анча яхши ҳамсиз. Сиз – буюк ишларга қодир инсонсиз. Сизда сиз ўйлаганингиздан ва хозиргача ишлатганингиздан кўра кўпроқ миқдорда талант, иқтидор ва имкониятлар мавжуд. Сизнинг ичингизда ҳаёtingизни ажойиб, қизиқарли ва ҳавас келтирадиган ҳолатга келтиришга имкон берувчи жуда катта потенциал мавжуд. Сизга юклатилган энг муҳим масъулият шундан иборатки, сиз мақсадларингизга эришиш йўлида буюк ишлар ҳақида орзу қилишингиз, нима қилмоқчи бўлганингизни аниқлашингиз, бу мақсадларни амалга ошириш режаларини тузишингиз, ҳаёtingизда ушбу китобчада кўрсатиб ўтилган стратегияларни қўллашингиз, ҳар куни орзу ва мақсадларингизга эришишга йўналтирилган конкрет ишларни амалга оширишингиз керак бўлади ҳамда ҳеч қачон ва ҳеч қандай ҳолатда ҳам таслим бўлмаслик ҳақида

қатъий қарор қабул қилишингиз зарур бўлади. Агар сиз буларнинг барчасини қилсангиз, самовий кучлар ҳам албатта сиз томонда бўлади. Сизни тўхтатиб бўлмайди ва сизга омад албатта кулиб боқади.

Adabiyotlar ruyhati

1. **Boylit qonunlari.** Abdullaev A.A. - Toshkent. “Yangi asr avlodi”, 2005
2. **Muvaffaqiyt kaliti: ETIKET.** - Toshkent. “Yangi asr avlodi”, 2004 yil
3. **Iztirob Asoratlari.** Deyl Karnegi. - Toshkent. “VORIS” nashriyoti, 2006
4. **Muomala sirlari.** Deyl Karnegi. - Toshkent. “VORIS” nashriyoti, 2005
5. **Bahit va Boylik sirlari.** - Toshkent. “Yangi asr avlodi”, 2007 yil
6. **Bo'lajak millionerlarga maslahatlar.** - Toshkent. “Yangi asr avlodi”, 2005 yil
7. **Boylikka erishish yuriqlari.** – Toshkent: 2010 yil.
8. **Тадбиркорлик маданияти ёки бизнес этикаси асослари.** – Тошкент: 2009 yil.
9. **Мулоқот маданияти.** – Тошкент: 2008
- 10. Одамийлик мулки.** Тоҳир Малик. Тошкент: “Шарқ”, 2012 йил



Муаллиф: Аюпов Равшан Хамдамович, фан доктори, профессор, 1950 йилда
Тошкент шаҳрида туғилган, дарслик, монографиялар, ўқув ва илмий-
оммабоп қўлланмалар ҳамда илмий мақолалар тайёрлаган ва нашр қиласан.



Ayupov R.X., Boltaboeva G.R.